

Jokotolè

MERTÈ BHÂSA NGAJHUM BHÂNGSA


MAJALLAH ABHÂSA MADHURÂ
ISSN 1979 – 6129

BALAI BAHASA
PROVINSI JAWA TIMUR



12

Januari – Juni
2014



Jokotolè

Majallah Abhâsa Madhurâ

JOKOTOLÈ
Majallah Abhâsa Madhurâ

Penanggung Jawab
Amir Mahmud

Pemimpin Redaksi
Dwi Laily Sukmawati

Dewan Redaksi
M. Dradjid
Syaf Anton, W.R.
Zaini
Lukman Hakim AG
M. Iqbal Nurul Azhar

Desain Grafis
Rahmad Hartono

Sekretariat
Anang Santosa
Rahmudi

Alamat Redaksi
Balai Bahasa Provinsi Jawa Timur
Jalan Siwalanpanji II, Buduran,
Sidoarjo
Telepon 031. 8051752, pos-el:
sya_lel@yahoo.co.id

Pèyatoran

Pojhi sokkor ka Ajunannèpon Ghustè Allah SWT sè ampon marèngè rahmat tor hidayah-épon, kantos Majallah Jokotolè eccabhân sè kapèng 12 (dubellâs) ka'đinto bisa rampong kalabân saè.

Akadhiyâ neng eccabhân kapèng 11 (sabellâs), sadhâjâ berta, carèta, tor bâca'an laènnèpon ampon jhekjhék aghuna'aghi èjhâ'ân (EYD) bhâsa Madhurâ hasèl *Konsinyasi Ejaan BM Tahun 2011* è Songennep. Sanaos ta' sadhâjâ oca' èserrat mabi èjhâ'ân *baku* (ètepteppaghi), akadhi oca' "lessoh", "pajhuh" tor oca' laènnèpon, Rèđâksi teptep ghumatè ka'angghuy nyebbhârraghi èjhâ'ân BM hasèl kamopakadhân Songennep. Nyebbhâllâ tolèsanna ca'- oca' sè kasebbhut dâri èjhâ'ân sè ampon tanto ka'angghuy ngormadhi otabâ noraè bânnya'na *dialek* neng bhâsa Madhurâ. Namong teptep ta' nombuwâghi maksod otabâ artè sè bhidâ dari oca'na.

Neng eccabhân sè kapèng 12 ka'đinto, cokop bânnya' berta sareng carèta sè parlo èkaghâli sareng para maos, akadi carètana Pangèran Bâto Potè èserrat sareng tarètan Ainur Anwar Al-Bath, Salèrana "Edhi Setiawan, Bhunga Dhâddhi Orèng Madhurâ" sè èserrat sareng Syaf Anton W.R. mènangka sastrawan Madhurâ dâri Songennep. Pokeddhan kalabân bhul-ombhul "Sombhângan Bhâsa Madhurâ Kaangghuy Kamajhuwânnâ Bhâsa Indonésia" èserrat langsung sareng Bapa' Mien Rifa'i. Selaèn ka'đissa', tarètan sadhâjâ jhughân kèngèng maos pan-saponapan tolèsan laènna akadhi: carpan, puisi, lalampa'an, lakon, saè èbâr, jâr-kalènjâr bân buđdhâjâ Madhurâ, tor salaèn épon.

Hal laèn sè nombuwâghi sennengnga atè, èngghi ka'đinto jhâkjhâggâ Bapa' Amir Mahmud, **kepala Balai Bahasa Provinsi Jawa Timur** sè terros nyerrat saloka Madhurâ kalabân bhul-ombhul "Boros (Tarapas)" sè èkaë'aghi sareng sèpaddhâ manossa. Hal ka'đinto mènangka sèttong tanđhâ sajân bannya' *pakar* sè ghumatè mèyara tor mertè bhuddhâjâ Madhurâ.

Moghâ-moghâ terbbi'na Jokotolè kapèng 12 ka'đinto bisa nambâi pangaonèngan tor panglèpor atè para maos.

Mator sakalangkong!
Ređaksi

Èssèna Majallah Kapèng 12



03 > Carèta

Pangèran Bâto Potè (Ainur Anwar Al-Bath)



06 > Salèra

Edhi Setiawan, Bhunga Dhâddhi Orèng Madhurâ (Syaf Anton WR)



10 > Pokeddhan

- Sombhângan Bhâsa Madhurâ Kaangghuy Kamajhuwânnâ
- Bhâsa Inđonèsia (Mien A. Rifai)
- Aromat tor Majhurbhu Bhâsa Madhurâ lèbât Program Berita “Kabhâr Madhurâ” (Dwi Laily S)
- Bâbâkton & Pandhuman Madhurâ Kona Èleppèt Majhuna Jhâman (Zaini)
- Sakaređhâbhân Parbhândhingan Pantun Madhurâ sareng Pantun Mlaju Sendèlan (A. Sulaiman S)



26 > Carpan

- Jhitho (Lukman hakim AG)
- Sèrè è Bâbâna Bhântal (M. Hoirul)



38 > Lalampa'an

- Balai Bahasa Provinsi Jawa Timur mabâdâ Kagiadhân neng Madhurâ (Dwi Laily Sukmawati)



41 > Jâr-Kalènjâr bân Buddhâjâ Madhurâ

- Tatakramaña Namoy/Katamoyan (H. Abdir Arifin)
- Jâr-kalènjâr dâ' Ka Karaton Songennep (Harkoni Madura)

44 > Saè Èber

- Kaldu Kokot Songennep (Wahyuni Zaen)
- Nase' Sèrpang (Sri Wulandari)

46 > Puisi

- Tèra' Bulân (Oktaviani, Z.F.)
- Ngajhi Rassa (Nurul Kholifah)
- Amaèn Bâng-Bâng (Suhartatik/Tika)
- Orèng Pojhur (Siti A.M)

48 > Kearifan Lokal Madura (Indura: Indonesia—Madura)

- Boros-Tarapas (Amir Mahmud)

50 > Kandhâ

- A, Sulaiman Sadik: Ngangghit Ta' Kennal Bâkto (Dwi Laily Sukmawati)



Pangèran Bâto Potè

Ainur Anwar Al-Bath

Bâto Potè otabâ dâlem bhâsa Indonesia èsebbhut *Batu Putih* mènangka sala sèttong kennengngan sè bâdâ neng Kabhupatèn Songennep. Dâri tengnga kottha Songennep nojhu ka dâjâ korang lebbina 20 km. Neng kacamadhân Bâto Potè kèngèng 14 dhisa sè sadhâjâna ghi' aromat tor ajâgâ sè nyamana bhudhâjâ lokal sanaos jhâman ampon akadhi samangkèn.

Manabi èyartèyaghi kalabân ghâmpangnga, Bâto Potè aghândhu' artè bâto sè abârna potè otabâ bâto bhâta (bâto kombhung). Biyasana neng dâlem bhâsa Madhurâna Bâto Potè èkala'ghâmpangnga To Potè. Ènyamaè bâto potè polana neng salanjhângnga tase' dâjâ neng bhâbâ ka'dinto kèngèng èyoladhi kennengngan kalèyan bâto sè abârna potè, molaè dâri Dhisa Jhuruwân Dâjâ (Juruwan Daya), Bâdûr (Badur), Dâng-Gheqqâhâng (Gedang-Gedang), Bâto Potè Dâjâ (Batu Putih Daya), Bhântèlan (Bantelan), Bullâ'an (Bulla'an), sareng Serghâng (Sergang).

Namong, mètorot carètana bârghâ sè bâdâ neng kenengngan ka'dinto nyama Bâto Potè

èpondhut dâri tengka polana Pangeran Ilyas sè bicaksana jhughân nèsèran, bâkto ka'dissa' mènangka Pangowasa Bâto Potè, sè saterrossa èparèngè jhuluk Pangèran To Potè. Bicaksana jhughân nèserran ka'dinto kèngèng èyartèyaghi tatak dâ' sadhâjâ bujud kejahadhân jhughân parkara sè korang saè, akadhi bujud nèseranna sè ètoddhuwaghi dâ' sadhâjâ maghârsarèna. Pramèla dâri ka'dissa', kèngèng èkoca' manabi bâto aghândhu' artè ghâli (tegghu) sabâtara potè artèna moljâ.

Salaèn dhâddhi kenengnganna kalèyanna bâto polana 60% bâto potè ka'angghuy parabhutta compo' neng Kabhupaten Songennep asalla dâri kenengngan

ka'dinto, Bâto Potè jhughân kalonta kalabân sebbhudhân Kottha Geddhâng. Polana sabâgiyân rajâ maghârsarèna ghâdhuwân talon sè ètanemmè bhungkana geddhâng, hososssa neng dhisa Dâng-Geddhâng sè dhâddhi kennengnganna Geddhâng. Nyama Dhang-Geddhâng mènangka bujud jâma' dâri oca' geddhâng sè dâlem bhâsa Indonesiana artèna *pisang*. Mala geddhâng hasèlla dhisa ka'dinto ta' namong èjhuwâl neng daèrana bisaos namong kantos kalowar polo Jhâbâ, akadhi neng sar-pasar jhughân Supermarket neng Sorbhâjâ.

Bâto Potè ta' lopot dâri sajara sè dhâddhi tongghâ' lahirra tor majuna Indonesia, Songennep hosossèpon. Anwar Sanusi onèng nyerrat manabi Arya Wiraraja (Adipati sè dâ'-adâ' neng Songennep) asalla dâri Bâto Potè. Akadhi sè èsebbhuddhâghi dâlem sajara, manabi salèrana Arya Wiraraja mènangka Adipati Songennep sè rasmî ajhumenneng tangghâl 31 Oktober 1269. Arya Wiraraja jhughâ maro'om nyama Songennep bâkto salèrana èkaparcajâ jhumenneng Panasèhat Raden Wijaya (manto Prabu Kertanegara), raja Singosari bâkto maddhek Karajhâ'ân Majhapaë' (1293). Neng bâkto ka'dissa', dhâddhi awâl jhâghâna Naghârâ Kesatuan Republik Indonesia sâ saterrossa kalonta kalabân sebbhudhân Nusantara.

Namong mètorot Anwar Sanusi neng attas bhidhâ sareng buku *Sejarah Sumenep* sè èserrat sareng Tim Penulis Sejarah Sumenep (TPSS) terbi'anna Dinas Pariwisata Kabupaten Sumenep taon 2003. Dâlem buku ka'dinto, sè nyerrat nyathet usulanna sejarawan dâri Songennep, Edi Setiawan sè nyatorraghi manabi Arya Wiraraja bânnè dâri Bâto Potè. Namong sanaos akadhi ka'dissa', kecamadhân ka'dinto pajhât ghâdhuwân pangaro sè rajâ dâ' kamajhuwânnna Songennep.

Dhimèn Pangèran Bâto Potè (Pangèran Ilyas) sempat ngastanè mènangka Senopati Songennep bâkto pamarènta'annèpon Pangèran Lor sareng Pangèran Wètan, sè bâkto ka'dissa' Keraton Songennep èserrang sareng tentara dâri Kerajaan

Bâto Potè ta' lopot dâri sajara sè dhâddhi tongghâ' lahirra tor majuna Indonesia, Songennep hosossèpon. Anwar Sanusi onèng nyerrat manabi Arya Wiraraja (Adipati sè dâ'-adâ' neng Songennep) asalla dâri Bâto Potè.

Bhâli. Maskèla bâkto perrang Pangèran Bâto Potè sèdhâ, namong jasattaèpon sareng karajhâ'ânnâ jhughân èlang. Pangèran Bâto Potè ghâdhuwân pangaro sè saè dâ' ka majhuna Songennep dâlem ajâgâ katentreman jhughân nata pamarènta'an. Tor sè parlo èkaghâli, panghâliyânnâ Pangèran Bâto Potè pagghun dhâddhi panodhân sè ètèndhâ sareng maghârsarè Bâto Potè kantos samangkèn. Kaangghuy males sadhâjâ jasana, asmana èpadhâddhi nyama jhâlân neng sala sèttong kenengngan neng Bâto Potè sopajâ asmana pagghun èèmodhi sareng sadhâjâ maghârsarè. Namong mètorot carèta, kobhuranna Pangèran Bâto Potè bâdâ neng dhisa Kalimo'o', Kacamadhân Kalianget. Namong kabhâr ka'dissa' ghi'ta' èpangghi jhâ' lerres. Wallahua'lam...namong Ghustè Pangèran Sè Maha Mèyarsa sadhâjâ kadhâddhiyân sâ bâdâ è bhumè.

*Carèta ka'dinto èserrat dâlem bhâsa Indonèsia sareng Ainur Anwar Al-Bath, saterrosèpon èmadhurâ'aghi sareng Dwi Laily Sukmawati, S.Pd., mènangka Patarjâmah Balai Bahasa Provinsi Jawa Timur.

Edhi Setiawan

BHUNGA DHÂDDHI ORÈNG MADHURÂ

Syaf Anton W.R.

Kantos samangkèn, ghi'
bâdâ sabâgiyân orèng
ngangghep jhâ' orèng
Madhurâ panèka kasar,
sangar, tor pan-saponapan
anggebbhân jhubâ' laènna.
Anggebbhân sapanèka
tantona raket kaèdhânnna
sareng bânnya'na
kadhdhâddhiyân carok sè bâdâ
è Madhurâ. Salaèn carok,
èkaèt-kaètâghi sareng
bânnya'na pan-saponapan
kadhdhâddhiyân sè èantarana
alibataghi orèng
Madhurâna.



(Salèrana bapak Edhi Setiawan)

Bânnya'na anggebbhân jhubâ' sè ètojjhuwaghi ka orèng Madhurâ adhâddhiyaghi bânnya' orèng lowar Madhurâ sè tako' tor kobâtèr manabi èntar otabâ akanca sareng orèng Madhurâ. Ta' ghun pèra' panèka, orèng Madhurâna dhibi' jhughân ta' sakon' sè aromasa toðus kaangghuy ngakonè jhâ' abâ' dhibi'na mènangka orèng Madhurâ. Dâri ghâpanèka, manabi bâðâ orèng Madhurâ odi' neng è lowar Madhurâ kaðhâng bâðâ sè ta' ngako jhâ' abâ'na orèng Madhurâ.

Bânnya' cara kaangghuy ta' ngakonè kamadhurâ'ânnna. Akadhi kalabân ta' ngangghuyyâ bhâsa Madhurâ maskè aðhâ-kandhâ paðâ orèng Madhurâna. Bhâsa panèka sè palèng ghâmpang ètalèktèghi dâlem kaoði'ânn. Bhidhâ sareng orèng Madhurâ sè pagghun ngangghuy kamadhurâ'ânnna maskè odi' è tana manca nalèkaakanðhâ paðâ orèng Madhurâna.

Hal sè kadhi panèka adhâddhiyaghi Edhi Setiawan apangrasa jhâ' abâ'na ètantang kaangghuy lebbhi ngaonèngè pan-saponapan ngèngèngè Madhurâ. Saè masala sajârâ tor kabhuððhâjâ'ânnna. Mongghu Edhi, anggebbhân korang saè sè èsambhâddhi dâ' orèng Madhurâ kodhu èpaloros ma' ta' terros dhâddhi pangrosak pèkkèranna orèng, otamana dâ' ka orèng Madhurâ dhibi'.

Sabâb, mongghu dâ' Edhi, orèng sè ngangghep jhâ' Madhurâ panèka kasar tor sangar polana ta' onèng dâ' orèng Madhurâ sè saongghuna. Artèna, orèng ngangghep jhâ' orèng Madhurâ kasar ponala coma ngabâs nalèka bâðâ kadhâddhiyânn carok tor ta' sampè' ngaonèngèn ponapa masala tor kadhi ponapa carèta sabellunna.

Salaèn panèka, Edhi jhughân ghâðhuwân pamangghi kodhuna orèng Madhurâ ta' mabi toðus kaangghuy ngakonè kamadhurâ'ânnna. Kabhunga'an mènangka orèng Madhurâ kodhu ètombuwagâhi dâlem atèna bhân-sabbhân orèng Madhurâ, molaè dâri na'-kana' kantos orèng dhibâsa è ka'ðimma bisaos, saè sè bâðâ è Madhurâ dhibi' otabâ sè odi' neng è tana manca. Sabâb, akadhi ampon èkaonèngè orèng Madhurâ panèka akadhi accènna bujâ. Kadhi ponapa bujâ? È man-ka'ðimman tanto bâðâ. Sapanèka jhughân sareng orèng Madhurâ, è bhumè bâgiyân ka'ðimman bisaos tanto bâðâ orèng Madhurâ.

Molaè sè bâðâ è naghârâ Indonesia kantos ka manca naghârâ. Akadhi, Malaysia, Singpura, Amerika, Bâlândhâh, Arab, tor naghârâ èn-laènna. Bâðâna orèng Madhira neng è man-ka'ðimman naghârâ kalabân pan-saponapan pangghâbâyân otabâ lako. Saè ngoli, dhâddhi pongghâbâ è naghârâ orèng otabâ asakola tor kasap

laènnèpon.

Kalabân nyebbhârrâ orèng Madhurâ è man-ka'ðimman mastèna bisa èpadhâddhi sèttong bâgiyân kaangghuy nambâi kabhunga'an mènangka orèng Madhurâ jhâ' saongghuna orèng Madhurâ panèka ghuongghu *aghârtang apello konèng, alako anggher ambhâ' patè*. Lèbârrâ bhumè katon korang lèbâr ècapo' kabârentengganna orèng Madhurâ.

Sabâb, bânnya' hal mènorot Edhi, dî'-andî'na orèng Madhurâ sè bisa èpadhâddhi kabhunga'an. Akadhi, okèran dâri Kardhuluk, keller, otabâ bhângonna cem-macemma sampan/parao, kerres dâri para empo Madhurâ tor ghi' bânnya' polè èn-laènna. Nangèng, pasèra saongghuna Edhi Setiawan panèka?



Edhi Setiawan aropa'aghi pottraèpon Gunawan sareng Juariyah sè kapèng tello'. Edhi, aropa'aghi pottra pandalungan dâri caporan katoronan Cèna-Madhurâ. Sabâb, bânga seppowèpon mènangka orèng Cèna. Nangèng ampon abit bâðâ neng è Madhurâ. Edhi aropa'aghi katoronan orèng Hokkian, Cèna sè dâteng ka Madhurâ ra-kèra abhâd ka-17. Bâkto ghâpanèka kateppadhân sareng aobâna kakowasa'an karajhâ'ânn Mingke Ching.

Salèrana aropa'aghi sala sèttong katoronan sè kapèng bellu'. Salèrana mastèyaghi jhâ' abâ'na aropa'aghi hasèl dâri katoronan pandalungan. Sabâb, mènorot Edhi sè dâteng ka Madhurâ panèka lalakè' sè akabin sareng bâbinè' Madhurâ.

Salèrana bhâbbhâr è Songennep lerres tangghâl 13



Januari 1946. Ngawalè sakola'annèpon neng SD sè èterrossaghi ka SMP Katolik Songennep. Saamponna ghânèka nerrossaghi ka SMA St. Luis neng è Sorbhâjâ jurusan bhuḍḍhâjâ. Saterrossèpon lerres taon 1974 salèrana nambâi èlmo neng è Fakultas Hukum Universitas Brawijaya Malang.

Salèrana mondhut jurusan hukum è bâktona neng Malang saongghuna bânnè pèlèyanna dhibi', nangèng aropa'aghi pèlèyanna orèng seponna. Sabâb, orèng seponna ngaghungè pangaterro Edhi èpadhâdhhiyâ hakèm akadhi tarètanna sè atowa'an. Saongghuna Edhi terro ngala'a jurusân sajârâ.

La, è bâktona bâdâ è Malang panèka Edhi molaè èkacaca sareng ca-kancana tor kaḍhâng kantos èco-koco polana orèng Madhurâ. Dâri panèka Edhi molaè ngartè bâḍâna angghebbhân jhubâ' mongghu orèng Madhurâ, otamana kalabân segghuddhâ èsan dingngaghi sareng masala carok, orèng Madhurâ ḍhu-bhuḍhu, mèskèn, tor angghebbhân jhubâ' laènna. Napa polè è bâkto panèka Edhi èkaparcajâ mènangka sala settong angghuta sènat, maka sajân dhâddhi ca-kancana sè nalèkteghi ghuli ennangnga Edhi.

Dâri panèka Edhi molaè apèkkèr jhâ' angghebbhân sè èara'aghi ka orèng Madhurâ panèka kodhu èpaloros tor èpateppa'. Dâri panèka, sa'amponna Edhi abâli ka Songennep, abâ'na aromasa ghâḍhuwâñ tangghung jâwâb kaangghuy ajhâr, mateppa' ponapa'a bisaos sè bâdâ kaèdhânnna sareng Madhurâ. Sala settongnga kalabân cara ajhâlân ka pong-kampong sè bâdâ è Madhurâ, dâri

Songennep kantos Bhângkalan.

Cara panèka kaangghuy ngaonènga Madhurâ sè saongghuna, ponapa lerres angghebbhân jhubâ' panèka lakar ghu-ongghu teppa' ponapa bhunten. Dâlem kabiysa'an panèka Edhi bânnya' ngaolle pangaonèngan ngèngèng kabhuḍḍhâjâ'ân tor sajârâ Madhurâ. Kabiysa'an panèka kantos mangkèn pagghun kalampam. Kaḍhâng, manabi ngalapa'aghi kabiysa'an panèka ngajhâk kanca otamana ngangodâdhân sè ghâḍhuwâñ pangalèbur dâlem hal kabhuḍḍhâjâ'ân Madhurâ.

"Hal panèka adhâddhiyaghi bhâdhân kaulâ sajân addhreng kalabân cara alabân angghebbâñ korang sae dâ' orèng Madhurâ. Bhuktèna, bânnya' orèng Madhurâ sè sukses è tana manca," dhâbuna. Kaangghuy abhuktèyaghi, taon 1982 Edhi abhâkta settong kasenniyâñ Madhurâ aropa topèng ḍhâlâng ka pansonapan naghârâ neng Eropa.

Edhi sangaja abhâkta kasenniyâñ topèng ḍhâlâng Madhurâ sabâb sadhâjâ orèng sè bâdâ è topèng panèka ta' asakola. Sadhâjâna orèng panèka orèng biyasa, èngghi panèka atanè. Nangèng, maskè kadhi panèka, ka'ahliyânnna dâlem hal atopèng bisa makasambu' orèng sè nèngghu neng Eropa. "Kabhuktè, bânnya' orèng Eropa ta' parcajâ jhâ' sènopèng panèka ta' sakola ongghu. Èngghâlè, rèng-orèng panèka atanè," carètana.

Salaèn panèka, kaangghuy ngennallaghi kabhuḍḍhâjâ'ân Madhurâ tor maèlang angghebbhân jhubâ' mongghu orèng Madhurâ, Edhi ngennallaghi okèran Madhurâ. Sajjhâgghâ taon 1970, rakana Trima

**Cara panèka kaangghuy ngaonènga
Madhurâ sè saongghuna, ponapa lerres
angghebbhân jhubâ' panèka lakar ghu-
ongghu teppa' ponapa bhunten. Dâlem
kabiysa'an panèka Edhi bânnya'
ngaolle pangaonèngan ngèngèng
cabhuḍḍhâjâ'ân tor sajârâ Madhurâ.
Kabiysa'an panèka kantos mangkèn
pagghun kalampam. Kaḍhâng, manabi
ngalapa'aghi kabiysa'an panèka
ngajhâk kanca otamana ngangodâdhân
sè ghâḍhuwâñ pangalèbur dâlem hal
kabhuḍḍhâjâ'ân Madhurâ.**



(Bapak Edhi Setiawan asareng kerabheddhâ)

Dewi panèka molaè lèbur ka okèran Madhurâ, Karðhuluk otamana. Pramèla ðâri panèka taon 1980 abina 15 tokang okèr è Karðhuluk. Hasèl okèran sè èbina Edhi ta' ghun èpasarragli è Madhurâ malolo, nangèng jhughân ka manca naghârâ.

Salaèn panèka jhughân èpangèrèng pamèran neng è Taman Mini Indonesia (TMI) Jakarta, Sorbhâjâ, tor èn-laènna. Sakonè'na bâdâ 40 macem okèran sè èkennallaghi. Lèma taon sa'amponna panèka, lerressèpon taon 1985, okèran Madhurâ tambâ èkennal orèng. Ðâri kaddhrengnganna ðâlem ngennallaghi okèran Madhurâ, Edhi ngaollè sèttong *penghargaan* Upakarti, aropa'aghi sèttong *Penghargaan* Presiden Republik Indonesia ðâlem *Usaha Pengembangan Industri Kecil dan Kerajinan* taon 1993.

Orèng seppo lake'na, Ike Setiawan, salaèn addhreng ðâlem hal kabhuðhâjâ'ân tor sajârâ Madhurâ, salèrana jhughân ngaghungè kaahliyân ðâlem moto. Ðâri kaahliyanna ðâlem to-moto, Edhi ngaollè pan-saponapan *penghargaan*. Akadhi, onèng mennang ðâlem lomba poto Piala Suharto, mennang nomer sèttong ðâlem lomba poto "Bali International Photo Competition (BIPC)" taon 1999, mennang ðâlem lomba

Ðâri pan-saponapan usaha sè èlampa'aghi, sajân makapèncot salèra ka Madhurâ. Sabâb, Madhurâ ampon dhâddhi bâgîyân sè ta' bisa èpèsareng salèrana tor kaoði'anna.

poto Asia Pasifik, Karya Anugerah Wisata Jhâbâ Tèmor.

Ðâri pan-saponapan usaha sè èlampa'aghi, sajân makapèncot salèra ka Madhurâ. Sabâb, Madhurâ ampon dhâddhi bâgîyân sè ta' bisa èpèsareng salèrana tor kaoði'anna. Ðâri ka'ðinto salèrana segghut dhâddhi *narasumber* ðâlem seminar ngèngèngè sajârâ tor kabhuðhâjâ'ân Madhurâ. Sala sèttong angghuta *Tim Penulis Sejarah Sumenep* (TPSS) sè èpakalowar *dinas pariwisata dan kebudayaan* (disparbud) Songennep panèka kantos samangkèn kaèna Rendy panèka bâdâ è Songennep. Lerressèpon neng è jhâlân Panglima Sudirman Songennep kalabân usaha ajhuwâlân neng â tokoèpon, "17 Agustus".

Sombhânganna Bhâsa Madhurâ kaangghuy Kamajhuwânnâ

Bhâsa Indonèsia

Mien A. Rifai

Sajârâ nasional ampon nyathet jhâ' è tangghâl 2 Mèi 1926 kongrèssa para ngangođâdhân Indonèsia sè èbâđâ'aghi è Bâtawi (samangkèn: Jakarta) ngoddhi nyarojhu'i usulan rèsolusi ngennèngè tèkad masèttongnga tana patobinan, bhângsa, bân bhâsa, sè rumusanna èsonon bi' Muhammad Yamin sakanca'an. Nalèka ghâpanèka jhugân para hadirin pas lajhunè terros bisa mopakat kaangghuy narèma jhâ' Indonèsia lakar pantes dhâddhi tong-sèttongnga naghârâ bân bhângsana pađâ'ân (= mereka). Tapè ta' sapanèka kabâđâ'ânnâ ngennèngè hal sè sèttong, èngghi panèka soal Bhâsa Malaju, sanajjhân sajjhegghâ dâri ghi' konana bhâsa bhuru ampon dhâddhi *lingua franca* sè èyanghuy bi' rèng-orèng saantèro nusantara.

Ta' dhuli sarojhu'na karapadhân bisa narèma rumusan Bhâsa Malaju kaangghuy èpadhâddhi tong-sèttongnga bhâsa neng Indonèsia, polana bâđâ sèttong hadirin bâkkèl dâri Madhurâ (èngghi panèka wartawan ngodâ Muhammad Tabrani) sè ngosollaghi sopajâ bhânsana èyobâ dhâddhi Bhâsa Indonèsia. Nangèng saranna ka'đinto ta' katarèma sareng hadirin sè laèn, lantaran nalèka ghâpanèka lakar ghi' tađâ' bhâsa sè anyama Bhâsa Indonèsia. Ngađhebbhi rammèna panolaghân ghellâ', ngangođâdhân Madhurâ bhuru lajhu makalowar sèttong panemmo sopajâ Kongres Pemuda sè kapèng sèttong ghâpanèka sè ngalahèrraghi Bhâsa Indonèsia.

Parlo bâkto langkong dâri dutaon kaangghuy abhâđhi osolan ghellâ' bisa èsarojhu'i sareng karapadhân para ngangođâdhân Indonèsia, èngghi panèka nalèka

èbâđâ'âghi Kongres Pemuda sè kapèng duwâ' è tangghâl 28 Oktober 1928. Akadhi sè ampon èkaonèngè sadhâjâ, sompana para ngangođâdhân—jhâ' orèng Indonèsia namong ghâđhuwân sèttong naghârâ, sèttong bhângsa, bân sèttong bhâsa èngghi panèka Indonèsia—samangkèn cè' kalontana sabâb èyangghep mènangka sala sèttong thok-patthok lalampa'anna sajârâ parjuwangan kamardhika'an bhângsa Indonèsia. Sajhâlân sareng kadhâddhiyân ka'đinto, pas maso' akkal manabi bânnya' orèng sè samangkèn anyata'aghi jhâ' Bhâsa Indonèsia panèka èlahèrraghi è tangghâl 2 Mèi 1926, èngghi panèka nalèka ngangođâdhân Madhurâ Muhammad Tabrani makalowar panemmona.

Sajjhegghâ tangghâl bhuru, Bhâsa Indonèsia lakar terrors tombu, mekkar, sarta èpamajhu sampè' dhâddhi mođèren kantos cè' bhidhâna sareng Bhâsa

parlambhâng bâdâ neng dâlem pantun Madhurâ saèstona sè sapanèka marghâ bâdâna tradisi/kabiyâsaan neng dâlem maghârsarè orèng Madhurâ èngghi panèka berkomunihasi sasarengngan serrèng aghuna'aghi oca' kèyasan, èbhârât sareng metafor. Rèng Madhurâ langkong aromasa pantes manabi aparèng pamangghi ka orèng laèn manabi pamangghi bhuru aghuna'aghi pangghâliyân sareng parasa'an lèbât ñhâdhâbuwân sè asèpat konotatif bânnè *denotatif*, kalabân sebbhudhân laènnèpon ñhâdhâbuwân sè asèpat tradisi kaanghep ta' alamiyah. Sè sapanèka marghâ parlambhâng bânnya' èartè'è namong sakadhâr "tandhâ" konvensional sè aghândhu' maksot pa-ponapa sè ècèpta maghârsarè otabâ abâ' sa-abâ' kalabân sèttong tojjhuwân sè namong asèpat ta' langgheng, sè sapanèka biyasaèpon èsebbhut mènangka lalabânan ñâri ñhâdhâbuwân sè alamiyah sè sèpaddhâ langgheng. Parlambhâng èghuna'aghi neng dâlem pantun ropana coma nodhuwâghi metafor akadhi rèng raddhin sareng bidhâddhâri, paðâ raddhin sareng bulân kembhâr, kadhi pantun è yattas.

Saèstona parlambhâng panèka bânnè capocabhân sè malolo èghuna'aghi sareng orèng Madhurâ bisaos tapè ampon sanèyap bhângsa è dhunnya panèka ampon paðâ aghuna'aghi. Ca'pon serradhân sè bâdâ neng *Ensiklopedi Indonesia* 6, 1983: 3178; Runes 1963:308 èsebbhuttaqhi jhâ' parlambhâng sareng lambhâng panèka asal molaèpon ñâri ghâlimpo' sastra neng taon antara 1885–1895 sè è ghâlimpo' kasebbhut bâdâ bhujhângghâ Prancis kasorang sè *eilhamè* sareng panâhita Nasrani Swedia èngghi panèka Emmanuel Swedenberg nyebbhut pamangghi parlambhâng sè takae' sareng parkara-parkara *rohani/kajiwaan*. Sapanèka jhughâ pantun Madhurâ angghâduwi artè konvensional èngghi panèka pa-ponapa sè ampon dhâddhi tradisi dâlem bhâsa Madhurâ akadhi kèyasan, èbhârât, sareng parbhâsan. Tradisi kasebbhut è attas akadhi tradisi berkomunikasi sareng Sè Aghung (aðu'a), komunikasi sareng paðâ manossana (ghutong rojhung), komunikasi sareng bhâlâ-karabâna (ngormadhi bhuppa'- bhâbhu' aropa ta'at ka atoranna), komunikasi sareng sakobhengngnga: alam sareng maghârsarèèpon (ngarabâdhî alam sakobheng tor akorrontong sareng tatangghâna) sadhâjâ èlaghuwagi neng pantun akadhi:

Namen cabbhi molong cabbhi
sè paë' sè ngènom jhâmo
Lar mandhâr Sè Aghung soddihi
marèngana għunong èlmo

namen sokon neng morðâjâ
ta' oði' polana katèghâ
parokon sareng tatangghâ,
ajjhâ' anði' bâtek tèghâ ,

*Jhâ' mamellas jhubâ' robâ
Sè ènga' dhuliyâ aobâ
ngèrèng alas jhâ'- robhâ
lè bânnya' aèng è sabâ*

(ASAS, 2002)

PANTUN MLAJU

Saèstona bhângon sareng struktur pantun Madhurâ ta'saponapa bhidhâna sareng pantun Mlaju. Pantun Mlaju èbâgi empa' ghâlimpo' èngghi panèka:

- Pantun 2 bhiri sè ènyamaè "pantun kilat"
- Pantun 4 bhiri
- Pantun lebbi ñâri 4 bhiri
- Pantun salèng akae' sè ènyamaè "Pantun berkait"

Ñâri empa' ghâlimpo' panèka pantun empa' bhiri sè bânnya' è sebbhâr è dâlem maghârsarè orèng Mlaju moderen samangkèn (Abdurrahman Abror, 2009:100) conto empa' bhiri pantun berkait neng pantun Mlaju.

*Dari Sibu ke pulau Kelapa
layang jinak jatuh tenggelam
ibu dan bapak sayangkan anak
jagalah dia siang dan malam*

*Layang jinak jatuh tenggelam
singgah sebentar rumah mbok Ija
jagalah dia siang dan malam
janganlah sampai terpengaruh ganja*

Singgah sebentar rumah mbok Ija

POKE DDHÂN

*taruh besi di atas meja
kalau sudah terpengaruh ganja
rusak sudah generasi muda*

*Taruh besi di atas meja
dibawa pergi ke desa
kalau sudah rusak generasi muda
siapa lagi harapan bangsa?!*

(Sh Laila, pantun berkait No 55,56,57, dan 58)

Panulis Pantun Mlaju (Balai Pustaka tahun 1958:23 è dâlem *Pantun Melayu, 2009*) abirjhi' tema-tema pantun Mlaju sapanèka:

1. Pantun anak-anak:

- a. pantun bersuka cita
- b. pantun berduka cita.

2. Pantun Orang Muda

- a. pantun dagang atau pantun nasib
- b. pantun muda : terbagi empat : pantun perkenalan, pantun berkasih-kasihan pantun bercerai dan pantun berhibah hati
- c. pantun jenaka

3. Pantun orangtua

- a. pantun nasihat
- b. pantun adat
- c. pantun agama

Nangèng parlo èkaonèngè pangghâlumpo'an neng pantun Mlaju amacem dhi-kadhiyâ tong-sèttong ahli pantun Mlaju paðâ ngaghungè pamangghi kantos bisa mabbingong para panalèktèk kaangghuy motosè sè palèng parjhughâ otamaèpon manabi paghâlumpo'an kasebbhut aðhâsar dâ' tèma , opamaèpon pamangghi dâri Zainal Abidin Bakar (1984: 30-31 è dâlem Abdurrahman Abror, 2009 Zainal Abidin Bakar maghâlumpo' *pantun Mlaju* dhâddhi 11 ghâlumpo' èngghi panèka (1) *Pantun adat* dan resam manusia (2) *Pantun agama* dan kepercayaan (3) *Pantun budi* (4) *Pantun jenaka* dan permainan (5) *Pantun teka-teki* (6) *Pantun kepahlawanan* (7) *Pantun pendidikan* dan *nasihat* (8) *Pantun peribahasa* dan *kiasan* (9) *Pantun kias* dan *ibarat* (10) *Pabtun kembara* dan *perantauan* (11) *Pantun percintaan*.

PANTUN MADHURÂ

Para ahli pantun Madhurâ pagghun nyebbhuttaghi jhâ' pantun Madhurâ panèka asallèpon dâri pantun Mlaju. (Sjamsuni, 2000: 76) Pantun Madhurâ, struktur sareng tata-cara ngangghit ampon kasebbhut neng bâgiyân attas. Pangompolannèpon talèbât majjhâ èngghi panèka:

1. Pantun Aghâma
2. Pantun bâburughân
3. Pantun Sè-kasèyan
4. Pantun Palegghirân otabâ Pantun Loco

Conto neng bâng-sèbângnga ghâlumpo' kadhi è bâbâ panèka:

A. Pantun Aghâma

Namen bhâko mon è sèram
Najjhân lesso bânnya' obângnga
Lamon ngako orèng Islam
Sabbhân bâkto wâjib bhâjângâ

(Muakmam, 2003)

B. Pantun Bâburughân

Klambu potè sapa rowa.
È tanangnga ngèbâ sorat
Mon abhâktè dâ' rèng towa
Slamet Dhunnya Akhèrat

(Muakmam, 2003)

C. Pantun Sè-kasèyan

Ma' olar- olar alèngker
Olar sanca mara lengnen
Ta' kellar bulâ sè nèser
Coma dhika ka ngen-angen

(Muakmam, 2003)

D. Pantun Palegghirân otabâ Pantun Loco

dâ'- ngendâ' ngajumè tolang
Sajân segghut sampè' nèlèng
Mon abâ' nojjhunè palang
Gut-margut èsangka malèng

(Muakmam, 2003)

POKEDDHÂN

Nangèng mongghu dâ' kaulâ abâk sangro antara pantun aghâma sareng pantun bâburughân. Mènorot hadis Nabbhi Saw: "aghâma mènangka bâburughân" aðhâsar dâ' haðis ghâpanèka tèma pantun aghâma sareng pantun bâburughân bisa sèttong ghâlimpo'. Pamangghi sè sapanèka aðhâsar dâ' tatekkon rèng Madhurâ sè Islami, taðâ' rèng Madhurâ sè poron èsebbut bânnè Islam, sanarè salèrana jhâu dâri syi'ar Islam. Prof Dr Hamka çâlem bukuwèpon (1982) nyerrat: ".....Madura menempuh jalannya sendiri, dalam lingkungan pandang hidup Jawa Pesisir , tanahnya miskin dan tandus tetapi penduduknya kaya raya dengan iman. Pulaunya kecil tetapi semangat Islam telak masuk ke dalam sumsum mereka , sebab itu mereka berjiwa besar. Dengan perahu-perahu yang hingga saat sekarangpun masih kita lihat berserak di pelabuhan-pelabuhan Indonesia, anak Madura berlayar. Tak takut angin tak takut badai , pisau belati tersisip di pinggangnya. Mereka lebih segan kepada kiainya dari pada kepada priyayinya. Merekja berlayar ke Bugis, ke Ternate, ke Pontianak ke Melaka dan juga ke Mekah. Di darast mereka mengadakan karapan sapi, di laut mereka berselaju perahu. Beberapa bagian dari pulaunya tidak dapat ditanami, karena tandusnya, namun anak Madura tidak pernah merasa dirinya miskin, kekayaan ada di laut. Guntingan baju dan pakaianya, menunjukkan kebebasan langkah tindak. Kaki celana besar dan tidak terlalu dalam sehingga mudah mengangkat kaki menyipak halangan, lengan bajunya tidak boleh terlalu tebal dan destar yang menghiasi kepala yang membawa kemanisan sendiri. Jiwa mereka lebih berdekatan dengan jiwa orang Bugis, yang sama suka berlayar. Maka tidaklah heran jika sekiranya setelah pamor kerajaan Gowa jatuh, salah seorang bangsawan Gowa (Makasar) Karaeng Galesong, mengembara dengan perahu serta anak buahnya, sampai ke Madura. Meskipun bahasa Madura dan bahasa Bugis jauh perbedaannya, namun bahasa Melayu sebagai bahasa penghubung pada zaman itu telah menghubungkan juga diantara penduduk pulau-pulau Indonesia. Tidaklah heran bila semangat mengadu untung dengan gelombang laitan betapapun besarnya, yang ada pada orang Madura, yang ada pada orang Bugis, dapat berpadu jadi satu.

Karena lima kali sehari mereka disuruh bersatu dalam bersembahyang berjamaah. Tidaklah heran jika kemudian darah turunan pangeran Langgar yang bernama Trunajaya memadukan tenaga menegakkan cita. Tidaklah heran jika Tru-najaya mengambil Karaeng Galesong menjadi menantunya. "

Nangèng neng panalèktèghân kaulâ, saèstona tèma dâri tong-sèttongnga ghâlimpo' neng pantun Madhurâ pajhât ampon salèng akaë' moddhâ jhughâ, namong bâdâ jhughâ sè mar-samar. Akadhi conto è bâbâ panèka:

A. Pantun Aghâma akaë' Bâburughân

Ngala' lalang ka Panglèghur
Nompa' rata sampèranna
Ta' alanglang dhika lèbur
Kor ta' loppa ka Pangeranna

(anonim)

Tèmon blungka' cabbhi campor

Ella dhâddhi arojhâghâ
Lamon dhika hajji mablur
Allah jhânjhi engghân swarghâ

(Muakkam, 2003)

B. Pantun Bâburughân akaë' Aghâma

Ngala' sèrè èpèpèsa
Èsarènga ghân sakonè'
Kanèserrè orèng towa
Sè mèyara kabit kènè'

(anonim)

Mèghâ' ebbhu' arè Satto
Arè Ahad pamolèna
Bhuppa', bhâbhû', ghuru, rato
Èhormat dâ' pâlâyanna

(Muakkam, 2003)

Neng Al-Qur'anulkarim bâdâ empa' Sorat sè aëssè firman Ghustè Allah sè makon manossa ngabhâktè ka rèng towa sè ðuwâ' èngghi panèka Sorat Al-Ankabut : 8, Sorat Lukman, : 14, Sorat Al Isra' : 23 sareng Sorat An Nisa' : 36.

\

POKE DDHÂN

Pantun sè-kasèyan akaè' bâburughân sareng aghâma

Bijjhân arta' bârna bhiru
Soro sođu ghân sabighi
Najjhân ella' tasè' jhâu
Mon jhudhu mastè apangghi
(Muakkam, 2003)

Pantun loco akaè'sè-kasèyan , ' bâburughân sareng aghâma

Perrèngnga ampon èpèkol
Saghâmè' ollè sapèkol
Du ajjhâ' lè-pèlè bukkol
Mè'- amè' ollè rèng dhingkol
(anonim)

**Sendèlan: Genre Puisi Madhurâ pantes èsebbhut
Pantun Madhurâ Tadisional**

Neng serradhân bhâb pantun panèka kaulâ sangajâ nyèngla dâri paparèghân sabâb mènorot kaulâ langkong pantes makaadâ' sendèlan. Sè sapanèka marghâ paparèghân serrebbhân dâri sastra Jhâbâ sè èsebbhut pari'an. Tor kaulâ ngakorè manabi bâdâ pamangghi jhâ' sendèlan aropa'aghi bhibhit dâri pantun Madhurâ tor bisa bisaos kabingkèngnga sendèlan bhuru èsambhât mènangka pantun tradisional Madhurâ seddheng pantun Madhurâ dhibi' pajhât serrebbhân dâri sastra Mlaju, sarenggan angghidhân panèka kangghuy abhidhâ'aghi pantun Mlaju sareng pantun Madhurâ artèpon sanarè pantun Madhurâ serrebbhân dâri pantun Mlaju sakonè' katèngal parbhidhâ'annèpon akadhi jhâjhârbhâ'ân è attas.

Angghebbhân sè ampon bâdâ bhâb sendèlan tor angghebbhân bhuru ampon kaserrat neng buku-buku pangajhârân Bhâsa sareng Sastra Madhurâ : *Sendèlan adalah paparèghân atau pantun yang digunakan sebagai sarana sindiran langsung* (Sjamsuni, 2000: 92). Namong parlo èkaghâli bhâsa sareng sastra neng *pan-saponapan* bâkto sè tanto bisa tombu angghebbhân- angghebbhân laèn sè bhidhâ sareng mamolanna otabâ kaangghuy masamporna

angghebbhân sè ampon bâdâ sè sapanèka sabâb bhâsa panèka aropa'aghi kasaroju'ân dâri maghârsarè sè angghâdhui bhâsa ghâpanèka. Tantowèpon sadhâjâ sè aobâ ghâpanèka èangghep kaangghuy majhurbhu bhâsa. Neng sastra Mlaju, sè para' pađâ'â sareng sendèlan èsebbhut *pantun dua baris* sè èkennal mènangka *pameo* otabâ *pantun kilat*.

*Malam ini malam Senin
Tanda kita orang Muslimin*

*Malam besuk malam Selasa
jangan kita berbuat dosa*

Tapè bâdâ *pameo* sè 4 bhiri, 2 *pameo* èpasèttong :

*Malam ini malam Jum'at
Malam besuk malam Sabtu
Minta doa biar selamat
Jangan meninggalkan sembahyang lima waktu*

Neng stanza pantun kilat Mlaju tađâ' atoran bhâb bânnya'na oca' sareng keccap (akadhi conto *pantun kilat* è attas).

Sendèlan neng Sastra Bhâsa Madhurâ

Èserrebbhâ pantun Mlaju ka sastra Madhura mènorot pamangghi kaulâ alantaran mongghu rèng Madhurâ pantun Mlaju ta' saponapa bhidhâna sareng sendèlan sè ampon lumbra bâdâna tor para' pađâ'â strukturepon akadhi skema rima sè teptep èngghi panèka rima ahèr a-b-a-b otabâ avareasi a-a-a-a. Salaèn rima jhughâ asonansi mènangka aspek sè dominan kaangghuy ngangghit pantun otabâ sendèlan. Sè sapanèka sabâb sendèlan sè èsessel laghi neng kèjhung bânnè namong duwâ' bhiri tapè empa' bhiri.

Pamangghi parkara sendèlan sè ampon kaonang neng ku-buku pangajhârân sastra Madhurâ èsebbhuttaghi èrèngkes dâri Sjamsuni (2000: 92—94).

1. Sendèlan aropa'aghi *sarana semmonan* è rèn-arèn otabâ neng è pentas, conto:

**Seomonanna orèng ka sè amassa' è dâpor
pangkor nyang-kornyan**

orèng dâpor nyang-kennyangan

Balessanna orèng sè è dâpor

bhâkona sakarenneng
lakona pabhâjheng

Sendèlan aropa dialog sè èsessellè pantun

A: Ka'bâuna dhika ma' nyreggâ'?

Tarom sè taromma
mano' ghessèng celleng molos
ro'om sè ro'omma
sala lasèng bâu tèkos

(ANONIM)

B: Pya, ma' bâdâ bhâi dhika Lè' pola sè ngoca':

Pađi sè pađiyâ
talonna bânnya' mottana
manđi sè mandyâ
araop coma matana

(ANONIM)

2. Sendèlan mènangka paparèghân sè èsenđellaghi, mèlana sendèlan neng contowèpon bâdâ sè empa' bhiri. Ghi' dhimènna mala kantos samangkèn rèng-orèng ngarè' è pèngghirrâ alas otabâ è ghâlighirrâ ghunong patang saot sè asendèlan biyasana rèng ngarè' orèng lake' nyemmonè orèng ngarè' bâbinè sè ta' patè jhâu dâri abâ'na:

Sèra sè anđi' tarnya'
èkella'a labân konđur
du sèra sè anđi' ana'
ma' ta' kellar atè sè lèbur

(ANONIM)

Rèng ngarè' bâbinè' nyambhidhi
Poter potè poter Bhâli
tal-ontalla ghulâ palo
mon ongghu nèser maddhâ dhuli

(ANONIM)

Akadhi neng pantun sendèlan jhughâ bisa èrassa'aghi bâdâna *relasi* antara artè sareng bhibhidhâna. Jhughâ palasdâ bâdâna kaghuna'an parlambhâng akadhi sè neng pantun. Bhidhâna Sendèlan sè palèng katara sareng pantun èngghi panèka temâ sendèlan ta' èbirjhi' akadhi temâ sè èrèncè neng è pantun sanarè birjhi'âmma temâ pantun Madhurâ coma ètantowaghi 4 bisaos. Sendèlan langkong serrèng èghuna'aghi neng kèjhung sè è èrèngè ghendhing laghu Jo-ijo, akadhi dialog lake'-binè' è bâbâ panèka

lake'

Bulâ abit ta' ajhâmo
Mellè bhândheng èra'-kerra' è laddhing ,.....*manes*
Bulâ abit sè ta' atemmo
Èdheng – pandheng ma' materro,*raddhin...*

binè'

Sattanangga ma' èsassa'a
Ngala' bâto èntar ka lorong
Ma' èmanna sè apèsa'a
Mon sanonto è kapolong

(anonim, Lèbur, Helena Bovier, 2002:288)

Cetthana sendèlan ampon aropa'aghi *genre puisi* Madhurâ sè akor sareng pantun tor pantes manabi sendèlan mamolanna aropa'aghi pantun Madhurâ sabellunna Madhurâ nyerrep pantun Mlaju. Cetthana sendèlan pantes èsebbhut Pantun Madhurâ Tradisional. Sè sapanèka pajhât pantun sè sokklana Pantun Mlaju kasebbhâr dâ' saantèro lo-polo è Nusantara tor neng tong-sèttongnga kennengangan sebbhuddhâna ta' padâ, akadhi neng Batak èsebbhut Èndè-èndè, è Jhâbâ è sebbhut Parikan, Sindiran è Sondhâ, Bolingoni è Tana Toraja, (Soegiarta, 1983:102) neng Madhurâ (?) èsebbhut Sendèlan.

CARPAN



<http://benysalim.wordpress.com/>

JOKOTO

Lukman Hakim AG.

Sajjhâggħâ mè-rammèna partai politik, otabâ saellana rēformasi tabukka' lèbâr, bânnya' roma ana-bârna. Lambâ', ghi' orèng ta' patè addhreng sè apèlèya dhâddhi upati, gubèrnur, prèsidèn, anggħuta DPR, DPD, bângkona orèng abârna potè kabbhi. Ta' ghun coma tabing otabâ romana sè èkorap abârna potè, tapè dâporra, pagħarrâ, kékessa, jèddhingga èkorap èpapotè.

Kapor ðâri ghâmpèng. Ghâmpèng ðâri bâto. Sala sëttong għunana kapor yâ èpangorap bân èkasella orèng amèna dhâddhi pappa'an. Bâdâ këya sè èkala' landâna kaangghuy èkajhâmo. Bâdâ këya sè èdhulittagħi ka bhâji' sè bhâkal èkèbâ' a ajhâlānan, ca'na rèng towa, ma' ollè ta' maso' angèn. Kapor bâdâ këya sè èkaghâbây tatambhâ. Sala sëttongnga èkaghâbây tambhâna sakè' tabu'. Carana, ngala' sapalokkor, èsabâ' ka ðâlèm accem sè la marè èbuwâng maghi'na pas èyontal.

Tapè ghâmpèn bânnya'an sè èpadhâddhi bhubhuk. Bhubhuk sala sëttongnga èpadhâddhi camporra tana bân sèmmèn, sè èkoca' lolo. Lolo èsaloy èpalèna kaangghuy majhâlān panqhemmèn otabâ għeddhung. Ta' bân-sarombân nyalon lolo, mon ta' tao bân ta' tè-ngatè, maka sokona otabâ tanangħha bhâkal nyalotthak polana panassa bhubhuk sè èsaloy. Mangkana, orèng sè alako nyalloġ lolo pas bânnya' sè ngangghuy sapatu biċċhung, bân mon bilâ la marè, pas akorap ampassa nyèor otabâ mènnya' kalettèk. Ma' ollè ta' ngapotè. Potèna cekka' maskè la èbâccowè ngangghuy sabun sakalè.

Bâto sè dhaddhi ghâmpèn saellana la èobbhâr saabiddhâ palèng sakejjâ'na saarè otabâ ɻubèllâs jhâm. Bâto sè èyobbhâr ta' bân-sarombân bâto. Bânnè bâto ghâbâk, bânnè bâto karang, bânnè bâto ètem, bân bânnè bâto kombhung. Tapè, bâto kalètthak sè palèng ghâli, sè palèng bhâgus èyobbhâr kaangghuy ngasèllagħi ghâmpèn potè bân nangkar. Ghâmpèn sè nangkar bhâkal ngasèllagħi bânnya' bhubhuk. Ta' patè bânnya' bâlānjhârâna otabâ manjilâんな polana matta.

Bâto èyobbhâr bânnè è tomang ðâlèm ðâpor. Bânnè èyobbhâr è kampowan. Tapè èyobbhâr è pangobbhâran sè ghun kaangghuy ngobbhâr bâto malolo, nyamana tomang rajâ otabâ jhito. Rajâna jhito agumantong ka orèng sè anđi' otabâ orèng sè aghâbây kaangghuy ngobbhâr. Bâdâ jhito kénè' sè ghun oso' sagħibik bâto, bâdâ sè kongsè oso' lèma għibik bâto. Bân ollèna bhubhuk aghumantong ka bânnya'na bâto sè èyobbhâr. Okoran bânnya' bân sakonè'na bhubhuk arèya kojānan. Sakojân kadhaddhiyâñ ðâri satos dupolo gembring.

Jhito èkaghâbây bângonna ðâ'-paðâ'a bân somor. Tapè ta' pas lajhu paðâ. Maskè jhito bân somor paðâ bâdâ bârâmbângna, tapè jhito bâdâ lân-bulânan. Jhito ta' kongsè ðâlem paðâna somor sabâb kalamon somor pajhât èpaðalem sampè' nemmo sombher rajâ. Sabhâtara jhito pajhât nyarè sè kérana ta' nyombher otabâ ta' mettø aeng saellana èkalè. Mangkana, jhito rèya abânnya'an è pong-kampongħa orèng sè abâk panèngħin otabâ pagħunongan.

Dâlem mma rā - kēra għu n-pēra' sapamanjhengħgħanna orèng towa kaangħħuy jhito kalabâan okoran seddħeng, ta' rajâ bân ta' kongsè kénè'. Sè èkoca' lân-bulâan arèya lobângħa jhito ē bâbâna bârâmbâng. Lobângħa ta' kongsè rajâ otabâ ta' patè lèbâr paðâna lobâng palèng attassa bârâmbâng bân ta' paðâ bân lèbârra għuwâ sè bâdâ ē ðâlem. Salaen jârèya, bâdâ sëttong lobâng kénè' sè ghun ra-kèra pēra' ɥukèlanan tèngħha bân lèbârra ka èrèng pēra' ɥukèlan këya. Nyamana panomangan, bâdâ sè ngoca' panyorongan, bân bâdâ këya sè ngoca' colo'na pangobbhârān otabâ jhito. La, ðâri lobâng arèya kaju, kas-rakas bân samacemma èpanyono'.

Kaangħħuy manyono' kaju sè èsorong ka ðâlem jhito bâdâ carana këya. Mon kaju bungkol otabâ kaju sèmbħâlān, nyaman maskè ta' ngangghuy tak-catak. Tapè, bilâ la teppa' ka kaju ranca', carang bân tè'-rotè' sè ta'bisa ghun coma ètegħħu ngangghuy tanang maka kodhu ngangghuy tak-catak. Tak-catak arèya kaju loros sè lanjhângħa ra-kèra sađeppa bân èkonco'na bâdâ cangħana. Cangħana ēketthok èdhina ē ra-kèra lèma nyarè. Ghunana kaangħħuy nandqèn kaju ma' ollè tasanqħet bilâ èsotħok ka ðâlem panomangan.

Nyorong kaju ka jhito kodhu tao ka èlmona. Ta' bân-sarombân nyorong. Jhâ' kongsè ta'-santa' ma' ta' lèkkas sonðħul otabâ possa' nènq ðâlem. Polana mon santa' ghâllu nyorong, ē ðâlem ta' lajhu èyabi' èkello'. Otamana mon kaju ghâli, kaju sèmbħâlān otabâ kaju bungkol. Mon kaju nga' jârèya kodħuna lakkar lè-lèrè. Tapè, ta' kennèn këya kongsè lè-lèrè ghâllu, tako'na sampè' mangoðâ apoy sè la dhâddhi. Bilâ apoy abâli ngoðâ polè, maka bâktona ngobbhâr sajān abit.

Sè palèng bhâgħus carana nyorong

pangobbhârân iyâ arèya kalabân aghânjungngaghi kaju ka dâlem tabu'na jhito ma' ollè jhâu dâri colo'na otabâ panomangan. Mon nyorong èghânjungngaghi, apoyya bhâkal nyergu' wâk-nga juwâk ka panomangan. La, jhito sè rajâ sergu'na arèya èkoca' jhito sè bhâgus. Rajâna nyergu', maka apoy bhâkal lèkkas towa. Bilâ apoy lèkkas towa, maka bâto sè eyobbhâr bhâkal lèkkas massa' dhâddhi ghâmpèn. Mangkana, mon nyoronga ka kaju ka dâlem jhito jhâ' paghâggâr teppa' è bâbâna panomangan, polanan bhâkal ngorangè serghuna apoy sè lat-nyambhilât. Bân sènga', mon nyorong kaju ka jhito, marè aghânjungngaghi kaju pas dhuli nyèngla ka èrèng ma' ollè ta' ècapo' olap apoy sè ngajuwâk ka panomangan. Mon, ta' ngastètè bhâkal èyolap mowana, èlang alès bân obu'na, mon ta' ontong katonon kolè'na.

Bilâ la èkèra mardâna otabâ arengnga ètangalè abâk tengghi otabâ sondhul maka kodhu èsardâ ngangghuy dâ-sardâ. Da-sardâ arèya nyamana pakakassa orèng ngobbhâr. Sardâ, arèya èkaghâbây dâri torossa palèmbhâng sè alanjhângan bân arajâ'ân bân tak-catak polana èsono' aghi ka dâlèm tabu'na jhito kaangghuy ajhugit mardâ, mè'-amè' bâdâ' kaju sè ghi' ta' èkèllo'. Salaèn dâri jârèya, ghunana sardâ kaangghuy ngorangè tombo'anna mardâ sè bâdâ è dâlem. Kalabân èsardâ, mardâ bhâkal lèbbi alos. Sabisa dhâddhi abu pas noro' ngabbher dhâddhi tolato abhâreng bân owa' sè kalowar ka attas.

Bârâmbâng iyâ arèya pèngghirrâ lobâng è attas. Mon bârâmbângnga somor èkaghâbây dâri lolo bân bâto, tapè laèn mon bârâmbângnga jhito sè ghun èkaghâbây dâri cellot bân tana bungkaladhân. Arapa ma' pèra' dâri tana? Ponala mon èkaghâbây dâri bâto, bâtona bhâkal massa' otabâ lejjhâr. Bilâ lejjhâr, bhâkal soro'. Mon soro', bhâkal ngangèn. Bilâ ngangèn, bâtona bhâkal matta, bân mon massa' bhâkal lejjhâr ka adâ' sabellunna èbâta'. Mon lejjhâr sabelunna èbâta', ghâmpènna bhâkal ghujur. Bilâ ghujur bhâkal sara kala'anna ka dâlem polana apolong bân mardâ otabâ abu.

Mangkana, bârâmbângnga jhito koðhu lèbâr bân soghâ' ma' ollè ta' soro' bân ta' ghujur. Mon terro ta'

ghujurâ, bârâmbâng jârèya bânnya' sè èsèmpay ngagguy talè sè èkaghâbây dâri perrèng ngoðâ, tapè bânnè ghâdhhebbhungnga. Tapè perrèng paðâna sè èpanalè'na dhâmè. Bânnya'na sèmpay aghumantong ka rajâ bân tengghina bârâmbâng. Mon bârâmbângnga rajâ bân tengghi, yâ, sèmpayyâ bhutona sajân bânnya'. Sabhâligghâ, mon bârâmbângnga kènè' bân mandhâp, sèmpayya pèra' parlo sakonè'. Tengghina bârâmbâng paðâ bân dâlemma tabu'na jhito sè èghurang ka dâlem tana. Okoranna molaè dâri lân-bulânan. Mon dâri lân-bulânan ka attas sapamanjhengngan, yâ, ka dâlem tana, ka bâbâ, ya, sapamanjhengngan kèya.

Karana ngobbhâr bâto arèya bhuto kaju sè kerrèng bân rangngo', maka, bâktona kodhu naspanas. Iyâ arèya bilâ la panèmor. Sabâb, mon ngobbhâr è mosèm nambhârâ' ta' kèra nemmo teppa' polana kajuna odi' bân bâcca. Bilâ bâcca tanto bhâi ta' kèra èkello' apoy. Kaju sè palèng ghâmpâng bân palèng lekkas matowa ka apoy iyâ arèya kalarassâ gheðdhâng. Salaèn jârèya iyâ arèya carang. Tapè, soronganna abâk sara. Apa polè carang ona' sè kongsè kodhu pènter èbâktona nastas, bân sè palèng ghâmpang nyorong bân èmbhâlân nyorong tantona kaju bungkol bân sèmbhâlân, sabâb kaju arèya ta' dhuli èyabi' apoy, ta' paðâ kas-rakas sè sakalèng aðâ' lajhu ngobhâl bân èyabi'.

Natana bâto è dâlem pangobbhâran bâriya kèya, bâdâ cara bân bâdâ nyamana bâng-sèbâng. Sè palèng bâbâ èkoca' bingkèr. Iyâ arèya, bâto sè ètata alèngker noro' pèngghirrâ lân-bulânan bân bârâmbâng palèng bâbâ. È attasanna jârèya pas ètata bâto polè sè abâk rajâ bân lanjhâng. Natana, po-campo konco' è tengnga'an. Bhungkèlla èpatoju' ka bâto sè èpadhâddhi bingkèr è pèngghir bân konco'na èparobbhu ka tengnga'anna lobângnga lân-bulânan.

Bilâ la bâto sè pa'-empa' jârèya èsabâ' pas abhângon lobâng sè bânnya'na pa'-èmpa' kèya. Dâri lobâng arèya apoy dâri bâbâ ajhâlan ka attas. Bâto sè bânnya'na pa'-èmpa' arèya sè èkoca' jhângka'. La, saellana jhângka' arèya la marè, bhuru nata sè laèn sampè' dâpa' maras bârâmbâng. Bân sènga', lobâng sè pa'-empa' jârèya jhâ' totop sabellunna maras bân

bârâmbâng, kènè' è bhâi kaghâbây palèbâdhânnna apoy ma' ta' massa' ka bâbâna malolo. Bhuru bilâ la maras bân bun attassâ bârâmbâng lobâng jârèya totop. Jhâlânnna lobâng sè pa'-èmpa' jârèya sajân tengghi sajânjhâu ella'na, noro'aghi lèbârrâ bârâmbâng.

La, bilâ la maras bân bârâmbâng bâto pas èsoson èpamoto tengnga pađâna soso otabâ pađâna ghusong. Bâto sè palèng lowar sè tas-attas nyamana langka'. Polana para' pađâ'a bân langka'. Bân è nga'-tengnga'anna bâdâ sëttong bâto èpanongko', nyamana cèng-kocèngan. Polana kabânnna'an bâto sëttong sè èpanongko' è tas-attas jârèya èngala'aghi sè para' pađâ'a bân kocèng sè pareppa'na toju'. È bâbâna cèng-kocèngan jârèya sabâgiyân orèng sè ghi' negghu' oca'na rèng towa biyasana èberri'i ñuri poka' maskè ghus pèra' saranca'. Bâdâna ñuri poka' dhâddhi sëttong sarat bân bâdâ artè kerata bâsana. Ca'na, ma' ollè topo bân cèkka'. Topo sè èmaksod bâtona topo, cekka' sè èmaksod bâtona ta' aghuli. Ta' ghujur, ta' bhurdu' ka dâlem.

Padâna taon-taon sè tapongkor, taon satèya Sudahnan bhâkal apangara ngobbhârâ bâto polè. Ombhut è teghhâllâ, èleggħâi, ranca'na kajuna ètotto bân kabbhi bu-tombuwân sè bâdâ è teghhâllâ ètastas. Tantona kaju bu-tombuwân sè ta' èkaparlo. Sabâb, è teghhâllâ bânnna'ju-kajuwânnna, padâna kaju mèmbhâ, jhâtè, kosambhi, bintaos, nyèor, bân tarèbung. Bâdâ bhungkana bukkol, bhungkana bacèn, bhungkana rokem, kabbhi ètastas ghan bhungkella.

Sabâtara bhungkana jhatè, bintaos, kosambhi, mèmbhâ ghus pèra' ètotto ranca'na bân bhungkana sè ta' loros èketthok këya. Kaangghuy bhungkana nyèor bân tarèbung ghus pèra' èkala' kalarèna otabâ bhularaggâ sè kerrèng. Manyang otabâ mangghâr sè tađâ' buwâna èpatoron këya. Bâriya këya carangnga perrèng sè akerrèngngan. Carang bân ona'na èrancap ghân satèngkès.

Kabbhi kaju sè la ètastas pas ètomo' è panassa arè gân sabârângkowan ma' ollè kerrèng. Bilâ la kerrèng pas ètalè' è ngangghuy jhâlingè bân bâdâ këya sè ngangghuy poco' bân ghâdhebbhung. Bilâ la marè ètalè' è pas èkèbâ ka sèmma'na jhito. Dâri bânnna'na

kaju sè èpangobbhârâ, Sudahnan ta' kellar mon èlakonè kađhibi'ân. Mangkana, kađhâng abâ'na apanglako otabâ adherrep orèng laèn.

Nyabâ'na kaju ta' bân-sarombân nyabâ'. Bâdâ cara bân atoranna këya, maskè atoran jârèya ta' atolès. Mon jhito apanomangan di bun tèmor, kajuna èsaba' di bun dâjâ, di lao' bân di tèmor. È bâgiyân bârâ'na èdhina ta' èsabâ'i kaju polana sara bilâ la ngala'a bân ambu nyanglong kajhitona.

Kajuna Sudahnan la èyangko' èpasemma'. Bâtona la dâteng. Mellè ka Man Arip tello ghibik. Bâtona ghus-bhâghus. Satèya Sudahnan bhâkal ngobbhâr ongghu. Pa-apa sè èkabhuto la èpapolong. Gheqdhâng bân ghulâ tarèbungnga la marè mellè ka Bu' Halima sè bhâkal èkaghâbâyâ kolek. Nalèka arè la onđung dâ' bârâ', asar mabâ ka sorop arè Sudahnan ngossay bâto. Ta' kađhibi'ân. Èbhânto binè bân ana'na. Bâkto sorop arè, nalèka arè ngalèng ka bândhung, Sudahnan marè sè ngossay bâto. Kalarè bân kalaras sè èkaghâbây parođibân èpasemma' ka panomangan. Sabâtara panomangan ètoto kalabân bâto kalètthak, ko'-tako' mè' bâdâ këbân sè maso'. Marè adân Sobbhu dâggħi' Sudahnan bhâkal nyolèt.

Adân Mangrib èkaèđing dâri corongnga langghârrâ Ka' Rahèm. Ropana ana'na sè anyama Rusdi dâteng dâri ponđhuk. Rusdi adân, sowarana cè' nyamanna èđingganna. Marè adan èterrossaghi kalabân jhi-pojhiyân. Du, cèllep ongghu aèng sosona emma'na.

Sudahnan sè la marè manđi maso' ka romana. "Mara sè abhâjâng, Cong," Sudahnan ngajhâk ka ana'na. Nyamana Dulla. Ongghuna nyama lanjhângnga Dulla arèya Abdulla, keng èyolok Dulla. Sabâtara, Sarini, binèna Sudahnan pareppa'na ta' ngennèng abhâjang otabâ katamoyan bulânan.

"Mara akamat."

"Èngghi, Pa'." Saoddhâ Dulla sè ètoro'è ngalakonè dhikanna rèng towana.

Sè kađuwâ' pas dhuli abhâjâng Mangrib ajâma'a neng romana. Marè abhâjâng sè kađuwâ' pađâ ađhikkèr. Marè ađhikkèr, Dulla ngajhi ètètènè Sudahnan. Sarini èmo' abhetthek è dâpor. Ala-ola kaangghuy kérèmanna orèng sè ngobbhâr. Biyasana, è kampongnga

Sudahnan, mon bâdâ sala sèttong orèng sè andi' lalakon maka tan-tarètan bân tatangghâna raghâp dateng nolongè.

Sudahnan bân Sarini dâlem samènggu arèya la pađâ ta' sabbhâr. Ta' patè bânnya' caca. Pèra' èkala' saparlona. Dâlem saarè bisa èbitong bârâmpa kalè kađuwâna acaca, apa polè dhâ'-kanđhâ'ân. Kađhâng Sarini bilâ pareppa'na bâdâ Dulla bân parlo ka lakèna maka Sarini ghi' èmo' mènta tolong ka Dulla. Ta' lajhu acaca ɭhibi' bân Sudahnan. Ta' pađâna biyasana sè cè' lèburra èyèđhingngaghi. Tapè, maskè ta' patè acaca, sè kađuwâ pađâ ngartè apa sè èkaparlo antara sèttong bân sèttongnga.

Aobâna Sudahnan bân Sarini polana bâdâ sèttong sè dhâddhi lantaranna. Iyâ arèya polana Sarini ta' endâ' ngandung polè. Sabâtara Sauđahnan cè' tèrrona sè aghâbâyâ alè'na Dulla. Ca'na Sudahnan, bânnya' ana', bânnya' râjhekkè. Sudahnan ngokowè pessenna rèng towa. Tapè, ta' bariyâ kalabân sè bâdâ sè pèkkèranna Sarini. Sarini ta' èndâ' sè nganđhunga polè polana sè kajâlânán bân lakèna pèra' odi' kar-karkar colpè'. Odi' cokop ghân ngakan. Sarini tako' otabâ kobâtèr mon andi' ana' polè bhâkal nambâi kabhutowan. Kemma sè mèkkèranna sakola'anna Dulla sè ghi' è kellas ɭuwa' MTs. Mangkana la'-ella' bâkto Sarini èntar ka bengkona Nyi Niwa. Tantono kaangghuy mènta oro'. Ta' pađâ na'-kana' satèya sè la ngangghuy program KB ka bidan è Polindès.

“Lè’...” Sudahnan molaè ngajhâk akanđhâ Sarini saellana marè malaè Dulla ngajhi.

Sarini ta' nyaot. Pagghun ngalottak è dâpor. Sowarana pèrèng ngaroncang pađâna sè èkowaë.

“Lè’...”

Sarini nyanđhâr. Tapè ta' kalabân èdhulluwi saot. Toju' è sèmma'na Dulla sè sèpa' toju' è lèncak ampèr. Marè ngajhi, Dulla ngallè ka pangkèngnga ɭhibi'kaangghuy ajhâr pangajhârân sakola'anna.

“Lagghuna tolos sè ngobbhârâ...”

“Ghi..” saoddhâ Sarini pandâ’.

“Bârâmma è dâpor, napè pon..”

“Ranta pon. Karè aola,” ta' ngantos Sudahnan marè sè acaca Sarini mègghâ' caca.

“Raddhin ongghu tang binè...”

“Laju pon! Bânnè mantan anyar polè.”

“Pagghun anyar, pagghun raddhin bân pagghun ro'om.” Sambi acaca Sudahnan jhâghâ dâri toju'na bân nyandâr ka Sarini. “Hem, ro'om ongghu dhika, Lè’.”

“Ta' manđi, ta' amènnya'!”

“Tang binè maskè ta' manđi pagghun ro'om. Maskè ta' amènnya' hem...”

“Napa polè pas akorap mènnya'!”

Sudahnan takèrjhât ngèđing oca'na Sarini. Abâ'na apangrasa jhâ' abâ'na ta' tao rassana mellèyaghi bedđhâ' bân mènnya' ro'om kaangghuy binèna. Sudahnan tao rassana mellè bedđhâ' bân mènnya'na Sarini ghun pèra' èbâktona abhâkalan bân èbâktona lamaran kabin. Saellana jârèya, sampè satèya ta' tao mellè bedđhâ' bân minnnya'na binèna polè. Apa polè satèya la sè kađuwa la andi' ana' Dulla.

“Lè’, orèng sabbhâr nèka nompa' jikar!”

“Èngghi jhât. Kèng orèng ta' andi' panèka èmo' kadhibi'.”

“Mangkana, orèng odi' nèka kodhu sabbhâr...”

“Kèng mon ta' andi' nèka bi'-nyambibi' polana èmo'kadhibi'.”

“Dhika ghi' pagghun pegghel ka bulâ?”

“Bhunten. Anapa'a ma' pegghella ka Panjjhengngan?”

“Ma' èlop ropana, kerso' alèssa?”

“Pon kala'na...” sambi jhâgâ dâri toju'na Sarini terro nyèngla'a dâri seddhi'na Sudahnan. Tapè, tanangnga kasandhet ètanangnga Sudahnan.

“Mađdhâ toju' na ghâllu. Bulâ ghi' bâdâ sè èkacaca'a.”

Sarini abâli toju'. Tapè pagghun ta' nyambit.

“Dhâbuna rèng seppo, mon terro massa'a kabbhi bâtona bilâ ngobbhâr, ta' ollè akarèggħingan, ta' ollè ngo'-marongo' bân ta' ollè bâdâ sè sedđhi. Saabidđâ ngobbhâr, molaè ngossay sampè' mâtâ' ajjhâ' sampè' bâdâ sè kor-pongkoran bân maređđeng macampo alès.”

“Pèra' ghâneka?”

“Karana ghellâ' ampon ngossay bân ðâggħi' marè Sobbhu bhâkal nyolet, bulâ, dhika, bân Dulla ta' ollè bâdâ sè apegghellâ. Kabbhi kodhu pađâ jhembhâr

bân kodhu pađâ rokon.”

“Tađâ’ polè?”

“Karana dhika sanonto ta’ ngennèng, dhingghâl ta’ usa nolongè nyorong. Cokop maranta è buđi.”

“Ampon?”

“Èngghi ampon. Sènga’ jhâ’ marongo’. Bân jhâ’ loppa sè dâgghi’ tèngnga malem...” Sudahnan mèsem sambi asowara abâk kène’, kajâna rèng to’-koto’ ka binèna.

“Ta’ ngennèng!”

“Maskè ta’ ngennèng pas ta’ tèdunga salèncak bâriyâ?”

“Ghi-pangghi ɏagghi’. Kaulâ ghi’ maroddhâ nyèyor.”

“Sanonto èbbhunna abâk tanđes. Nyarepsep bân macellep ka bhâdhâ. Sapo’ sarong ta’ cokop. Rassana jhât bhuto sapo’ sè bisa maanga’...” Sarini jhâghâ bân nojjhu ka ɏapor. Sudahnan jhâghâ kèya pas lajhu ngaddhek abhâjang Isa’. Monyèna nyèyor èparot ngancaè Sarini è ɏapor. “Bânnya’ ghi”, Lè’?”

“Karè sakone’.”

“Ètolongan?”

“Ampon, ta’ mabi. Kalangkong.”

“Mađđhâ na...”

“Ampon ko...”

“Ghi mon kadhi ghânèko bulâ tèdunga ka ađâ’ ghi.”

“Èngghi.”

“Tapè sènga’ ghun dhâddhi pangkor sè nyang-kornyanan. Orèng ɏapor nyang-kennyangan..”

“Patè’ èkakan landâ’. Orèng lakè’ tokang matađâ’.”

“Dâgghi’ jhâghâi ghi, mè’ tako’ takèthas sè nyoleddhâ.” Ta’ ngantos saoddhâ Sarini, Sudahnan maso’ ka pangkèngnga saellana sabelunna èntar ngongngang bân makanè sapèna è kanđhâng sè bâđâ è buđiyânnna ɏaporra. Umomma, orèng Madhurâ sè anđi’ tana bân atanè pastè ngobu otabâ ngowan sapè. Ca’na èman ka rëbbhâ sè bâđâ è sabâ. Kalabân ngobu bân ngowan sapè bhâkal ollè ɏukalè. Salaèn ollè hasèl dâri sè ètamen, orèng Madhurâ, ta’ kajhâbâna Sudahnan, ngaollè rebbhâ ghâbây pakanna sapèna. Sudahnan

maso’ pangkèng, tèdung è lèncak bhungkèl aerrèng perrèng.

Malèm sajân kacèp bân seppè. Monyèna mano’ taras sap-nyapsap è attasanna ghentèng. Sarini ghi’ pagghun bâđâ è ɏapor. Ongghuna ghi’ bânnya’ lalakon sè ghi’ ta’ marè. Abâlâ karè sakonè’ ka lakèna polana tako’ èsandherri Sudahnan. Dâlem abâ’na ghi’ bâđâ karèna pèkkèran sè mapeggel ka atèna. “Sabâb mon ta’ polana Ka’ Sudahnan ambu ngajhâr neng sakola’an, ta’ kèra malarat pađâna satèya,” karettegghâ atèna Sarini.

Dâlem atèna Sarini, pèkkèranna ajhâlân. Kemma ana’ sajân rajâ, tèngka sajân bânnya’. Bulân Reràjâ mèrammèna kabin bân ghâbây. Sabâtara pangasèlan pađâna sè ta’ nyokobhi ka sè èkakana bhâlakkâ’. Ana’ la sajân rajâ. Kabhutowan sakola’anna sajân rajâ kèya. Maskè satèya la bânnya’ bhântowan dâri pamarènta kaangghuy na’-kana’ asakola, pagghun bhâi bânnya’ bhândhâna orèng asakola. Kemma sangona bân èn-laènna.

Nyamana kabhutowanna orèng ođi’, apa polè è jhâman satèya, kabbhi pađâna sè kodhu mellè. Satèya la tèra’ ngangghuy lampu. Yâ lampu ambu majâr sabbhân bulân. Satèya atana’ la ta’ ngangghuy tomang polè, maskè orèng dhisa sakalè. Kalabân bâđâna program pamarènta sè awâjibbâghi kaangghuy ngangghuy kompor eggas, orèng kabbhi ngangghuy kompor eggas. Yâ, eggassa kodhu mellè kèya. Maskè karè mettè’, tapè yâ ambu majâr kabbhi. Ella bilâ la eggas sara bâlliyanâna pas posang polana bânnya’ orèng sè la ta’ anđi’ tomang tana bân ta’ asadiya kaju.

Abâliyâ ka dhâmar conglet bân dhâmar talpè’, mènnya’na satèya larangnga ta’ kennèng labân. Nyambhung lampu kodhu majâr, mon ta’ majâr yâ èpegghâ’. Abâliyâ ka kompor mènnya’ yâ satèya la rangrang orèng anđi’, mènnya’na larang. Lambâ’, è bâktona pamarènta adhu’um kompor bân tabungnga eggas, Sudahnan ta’ dhuli ngangghuy polana tako’ bân kobâtèr èkaleddhui’i pađâna kabhâr sè bânnya’ kadhâddhiyân è man-đimman. Mè’-amè’ abâ’na èkalèddhu’i kèya.

Sambi marot nyèyor, Sarini terros ngajhum

pèkkèr sè aghârunđel è otègghâ. Monyèna mano' taras op-nyaop è attasanna orèng binè' sè ghi' ta' tèdung jârèya. Ca'na rèng kona, mon bâđâ monyèna mano' nga' jârèya tanđhâna bâđâ orèng nyarè mangsa.

“Salamet. Nyarè laèn, tang sapè jârèya ta' noro' andi'. Ngala' owanan ka orèng.” Ca'na Sarini pađâna bâđâ orèng laèn sè èkabhâreng acaca. Maksoddhâ, tanto mè' bâđâ orèng nyarè mangsa ongghu sè ella sèmma' ka romana.

Tambâ malem, Sarini tambâ katonđu. Kalakowanna la karè sakonè'. Nyèyorra la marè éparot. Karè perressanna bân karè andhellâna pathèna ma' ollè ta' bhâreng sè èkaghâbâyâ kowana ghângan labu ghi' lagghuna. “Tapè, mon Ka' Sudahnan pagghun ngajhâr è sakola'an bân ta' èbâjâr, apa iyâ bisa odi' lèbbi nyaman dâri satèya? Apa ta' nambâi mabânnya' otang kèya polana ta' andi' pangasèlan?” Pèkkèranna Sarini sajân ajhâlân.

“Sè dhâddhiyâ patè bhuto lako abit. Bhuto kasabbhâran nyombhât, naltal, marot nyèyor bân merres. Bhuru pas ngaollè pathè, kađhâng pathè kanèna ghun sakonè'. Apa nga' arèya jhâlâna tang kaođi'ân abhâreng Ka' Sudahnan? Ghustè, mandhâr ghi' bâđâ'a li'-bâli'na ñađar.”

Sudahnan tèdung, Dulla tèdung, bân tatangghâna la pađâ tèdung kèya. Sarini karè kadhibi'an sè ghi' mella'. Malem tambâ kacep. Angèn ceddhu. Un-đâunân mèjheth. Èkarassa ongghu cèllebbhâ ebbhun malem satèya. Maskè ghi' mella', tapè Sarini la katonđu. Mella', matana keng la copè', aoway ta' kennèng alang. Lalakonna la marè. Lampu è ñaporra èpatè'è. nojjhu ka èmpèr. Lampu è ampèr ghi' tèra', loppa ta' èpatè'è bân Sudahnan. Labâng ađâ' ètèngghu. Ropana pèra' ètotop bân Sudahnan. Palang èpasang bân Sarini. Lampu è ampèr èpettè' kèya, matè. Satèya petteng kabbhi èssèna roma sè èkennengngè tello orèng sè kadhâddhiyân dâri lakè-binè bân sèttong ana' jârèya.

Sarini pas marobbhu è lèncak bungkèl sè bâđâ è ampèr. Ta' dhuli ngèđđhâ. Mano' taras nyalaop polè è attasanna bèngkona. Sarini kabâtèr, keng tako' sè kalowara. Sè ajhâghâ'âna lakèna nèsér, polana

Sudahnan bhuto jhâghâ bâkto sobbhu kaangghuy nyolet. Saarè bhântèng lagghuna bhâkal alako ta' buambu è pangobbhârân sampè' notop. Bit-abit Sarini molaè talèyer kèya maskè sabellunna pèkkèran pegghel ka lakèna ta' èlang sakabbhiyâna bân rassa kabâtèr kalabân bâđâna monyèna mano' taras.

Malem dhâddhi der-bhender èsep. Seppè bân kacep. Sarini sè ngalotthak è ñâpor satèya la aghentang kaélangan sokmana. Sudahnan la ngerrok maskè ghâ'-pegghâ'. Dulla bariyâ kèya, panyakè' menggèna ghi' ta' bârâs. Bilâ tèdung ngog-sèrngoghâ. Cè' katarana monyèna bilâ la tengnga malèm.

Tarhèm Ka' Rahèm ajhâghâ'an lèbât corongnga langghâr sopajâ orèng jhaghâ dâri tèdungnga kaangghuy ngalakonè bhâjâng sonnat bân aparnyo'onan. Ajâm akongko' dâri ñâlem kandhângnga. Bâđâ sè akongko' dâri attas ranca'na palèmbhâng. Sakèjjhâ'agghi' adân Sobhhu bhâkal amonyè. Tapè, è romana Sudahnan tađâ' sè jhâghâ'a. Binèna nyaman tèdung è ampèr. Sudahnan ngerrok è pangkèng buđi. Sabâtara Dulla ajhâlpang neng pangkèng ađâ'. Mangkana Ka' Rahèm lamamarè adân Sobhhu. Ajâm abhâriyâghâna tanèyan.

Sudahnan abhâluđhus dâri pangkèngnga. Jhâghâ takèrjhât polana la ra'-tèra' tana. Sudahnan alonca' lajhu nojjhu ka jeđdingnga. Ngala' bullu bân terros abhâjâng sobbhu.

“Bulâ ma' ta' èjhâghâi?”

“Hem...”

“Ha hem ha hem soro jhâghâi ko ta' èjhâghâi. Dhâddhina pas takèthas kabbhi. Taker abân sè nyoleddhâ nèko,” sambi ajhâlân ka bârâ'-ka tèmor nyarè salènan kalambhi lakona. “Jhâghâi ana'na, bulâ ka jhitowa, nyoleddhâ ma' ta' matè malem notobbhi ñâggħi'.” Sudahnan èlang è labâng. Sarini ghun ngabâs kalabân pèkkèran ghetton. Saellana ngabâs ka lowar sambi makompol sokmana, Sarini dhuli jhâghâ dâri tèdungnga.

“Dul, Dul jhâghâ, Dul. Abân la. Sè asobbhuwâ bân tolòngè èppa'na pongpong parèi sakola'an.”

È ađâ'na panomangan, Sudahnan negghu' kalarè è tanang kacèr bân corèt è tanang kanganna.

“Bismilla, salamet, bâto èobbhâr nyonyor dhâddhi ghampèn, nangkar dhâddhi bhubhuk. Nyèngla kabbhi la-sala.” Satekkem kalarè sè la marè èsolet konco’na èsono’aghi ka panomangan samarèna nolès lang-kalèng è attassa panomangan. Apoy è dâlem dhâddhi rabâk, ngobhâl andhâddhiyagi owa’ celleng abubungan ka attas. Sudahnan terros ta’ bu-ambu nyorong kaju sè ngo’-rangngo sopajâ apoyya sajân dhâddhi.

Saabiddhâ kadhibi’ân, Sudahnan ngala’ bân nyorong kaju èkadhibi’i. Ta’ abit polè Dulla pas dâteng abhânto nanèng kaju sè bhâkal èsorong Sudahnan. “Kala’ sè rèng-kèrrèng ghâllu, Dul. Jârèya kalarassa gheðdhâng neng bun dâjâ kaðâ’ pataðâ’ apoyya ma’ marong.”

“Èngghi. Ma’ abân sè nyoleddhâ, Pa’, ca’èpon èpalaggwuâ?”

“Sè èpèkkèrè emma’na takèthas sè ajhâghâ’ana. Kongsè adhulluwân engko’ jhâghâ, sella bâriyâ takèthas kèya.” Sambi nyorong, kaðuwâna sambi aðhâ-kanðhâ.

Arèna sè matao robâ ðâri bun témor sajân tengghi. Paðâna nalar nèng bhungkana tarèbung. Nè-nyornè’ è cellana ðâun mèmbhâ. Arèna moncar sajhângngowan. Sarini ngombâr nyo’on kérèman sè èbâðdhâi jebbhung.

“Ka’ Sudahnan, sapèna è kanðhâng taðâ’!”

“Napè? Jhâ’ aghâjâ’na sè nè-bânnè mon pèra’ tèrro nyapa’ a ka rèng gântheng akadhi bulâ.”

“Ongghuwân, Ka’, sapèna èlang sapasang, labângnga athatthang, bân rëbbhâna bherse è malongan!” Sarini sè rit-tabhirit matoron jebbhungnga.

“Ambu na, Lè’, jhâ’ amèlèr ko!”

“Kaulâ ta’ amèlèr. Ongghuwân. Mon ta’ parcajâ oladhi dhibi’.”

“Kan-ngakan kaðâ’, Cong, dhina engko’ sè nyoronga. Ghântèyan.”

“Èngghi.” Dulla nyandher ka cèbbhung sè aëssè nasè’bân jhuko’na.

“Ka’?” Sarini maksa.

“Pon ta’ kèra bâdâ bângal ngala’. Dhisa ñinto’

nèko tamaso’ aman. Kalèbunna pon marè asallèm ka ratona bâjing. Dhâddhi jhâ’ kobatèr bâdâ marghâsarè kaèlangan sapè.”

“Ai, Ka’ Sudahnan...”

“Ampon paparcajâ ka bulâ...”

“Panjhennengan paparcajâ jhughân ka kaulâ.”

“Torè èghântèya, Panjhennengan sè aðhâ’ârâ ðhimèn, Pa’.”

“Iyâ, ya’ ghântè ghâllu...”

Sampè’ Sudahnan marè ngakan, Sarini pagghun maksa sè abâlâ ka lakèna jhâ’ sapèna lakar ghu-ongghu la taðâ’ è kanðhangnga. Tapè, Sudahnan pagghun ta’ parcajâ. Ngangghep binèna pèra’ aghâjâ’â. Ta’ èkaparcajâ cacana, Sarini pas dhuli molè kalabân colo’na ngacam salanjhângnga parjhâlânán ðâri jhito ka bângkona.

Arèna sè nyonar paðâna sè la naccek è attasânnna cèthak. Dulla bân Sudahnan lir-ghilirân nanèng bân nyorong. Ðâpa’ bâktona bheðdhuk, ghilirân sè abhâjâng. Bilâ marðâ la kèra tengghi bân sonðhul, èsarðhâ. Bâriyâ saterrossa, asar, bân mangrib. Sudahnan bhuru parcajâ bilâ molè è bâktona abhâjângâ duhur jhâ’ sapèna lakar èlang. Ta’ kala ka colo’na rèng binè’, Sudahnan nyacam kèya. Pèkkèranna sajân aghundhel. Kemmana èmo’ ngobbhâr, kemma mèkkèrana sapè owanan sè èlang. Bârâmma mon ta’ èsarè. Bârâmma sè ngèdinga panglona Man Burhan mènangka orèng sè anđi’ sapè mon ta’ èsarè. Kèmmana binè sè mamanglo ka abâ’na.

Ngakan kolek paðâna sè taðâ’ rassana è jhilâna Sudahnan. Sabâb pèkkèranna aca’-ranca’ sankasannaghi. Sampè’ ðâri pegghellâ pèkkèrra Sudahnan, kocèng sè lèbât è aðâ’na panomangan noro’ èontallaghi ka ngobâllâ apoy dâlem jhito. Ètambâ polè apoyya ta’ dhuli towa, pagghun mèra maskè la dhungrap bân nyoroy molaè ghella’na. Sè ollè bâk mapotè polana ètaburi bâlirâng sè èbelli ka Sa’rani è pasar Ghâppora. Sampè’ kaju sè èpanyorong bân notobbhâ pangobbhâran Sudahnan ta’ tennang. Marèna ngobbhâr lajhu mangkat èntar ka kalèbunna kalabân maksot alapor bân mènta partolongan bhâb sapè owanna sè èlang.

Samalem bhentèng nyarè sapè abhâreng kalèbunna bân bhâlâ tangghâ. Samalem bhentèng ta' molè, bân bhuru molè kalagghuwânnna bilâ la mâta'a ghâmpèn neng jhito. Cèng-kocèngan èangka'. Langka' épatoron. Ngabâs bâto sè èyobbhâr pagghun bâto, ta' aobâ potèna ghâmpèn. Pèkkèranna Sudahnan sajân salbut. Pegghellâ sajân ngobhâl. Sajân ngalkal. "Mon ta' polana dhika, ta' kèra nga' nèko dhâddhina."

"Du, kan Panjhennengan sè ngontallaghi kocèng ka dâlem jhito?"

"Èngghi larak!"

"Ma' pas kaulâ sè èsala'aghi?"

"Pegghel!"

"Ka pasèra?"

"Dhika"

"Ma' pas aro-morowan ka kocèng? Mon pegghel ka orèng, jhâ' aro-morowan ka kèbân. Kèbân ta' andi' akkal. Ca' na Panjhennengangan ajjhâ' sampè' bâdâ kèbân maso' ka dâlem jhito. Napa polè èsangaja. Maka..."

"Ngajhâri rèng lakè'?"

"Mon orèng lakè' parlo èpateppa'?"

"Dhika ngèra bulâ sala?"

"Apangrasa?"

"Èngghi jhât..."

"Ghi pojhur manabi apangrasa!"

"Tapè ta' parlo bhâburughân dâri rèng binè'!"

"Anèka ghunana orèng alakè-binè ca' na rèng towa..."

"A... ma'..."

"Ka' emma' an dâri sala sèttong sè korang tèppa' ghi sé sèttonganna sè matèppa'. Dhâddhi manabi rèng lakè' sala, rèng binè' sè matèppa'. Sabhâligghâ..."

"Rèng binè' cengkal lako acangnga'... mangalkal ka bâbulangan."

Kareb amata'a ghâmpèn. Nyatana pagghun bâto. Jhângka'na sakalè pagghun Bâto. Ngalètthak.

"Ca' èpon manabi orèng ngobbhâr kodhu sabbhâr. Nyatana Panjènnèngan dhibi' sè ngoso' saabiñdhâ ngobbhâr..."

"Ambu jhâ' acaca malolo," Sudahnan sajân pegghel ngèding binèna acaca. "Ta' latèn kadhi..."

"Napa? Mangkana manabi bâdâ rèng binè' abâlâ, pèrengngaghi bân paparcajâ."


Ta abit polè Sudahnan sè ko'-nongko' è bârâmbâng bân negghu' ghuntèng perrèng pamata'na ghâmpèn lajhu negghu' binèna. Binèna aghâlibat tapè ta' kowat ngalang ora'na lakèna. Sarini ètajhâ' pas ècabbhur ka dâlem jhito sè mardânâ ghi' marong. Sarini rèng-cerrèngan mènta tolong. Sudahnan ta' marduliyaghi binèna.

Dâri jhâuna Dulla berka' ngèding emma'na rèng-cerrèngan mènta tolong. Ngabâs ka dâlem emma'na èkello' apoy. Tao jhâ' sapa sè macalaka' emma'na, Dulla lajhu ghîghir ka eppa'na. Èppa'na èsothok sopajâ dhuli nolong emma'na. Èppa'na tajharungngep këya maso' ka dâlem jhito. Tapè, sabellunna jârèya, tanangnga Sudahnan ghi' sempat negghennè ka Dulla. Dulla kala dhâmmang. Dulla noro' ghâggħâr këya ka dâlem jhito. Sè katello pađâ aghâlubuk kapanasân dâlem jhito. Rèng-cerrèngan mènta tolong. Pas èsep. Aghântè owa' celleng sè abubung ka attas. Bâu manossa èkello' apoy. Angèn ceddu. Owa'na loros nojjhu langngè'. Cè' cellengnga. Cè' tengghina. AOLENG acampo bân onđem.

Songennep, 2013

SÈRÈ È BÂBÂNA BHÂNTAL

Mohammad Hairul



Toju' è paddhuna lèncak, kadhibi'ân. Sokona ètorot aghântong
lemmes nyeddhing ka tana. Sonar matana sorðeb, ghun dheb-
keddhebhân. Sanyatana ta' terro sè tèdunga.

Malem sajân seppè, la lem-samalem Firða ta' ngidđhâ tèđung. Èlèrèk ka bhântal sè atompo' ta' èangghuy è pèngghir lèncak. Bâđâ sèttong "bhârâng" sè èyèrrep è bâbâna bhântal. Aropa salembâr sèrè sè la lem-samalem èkacèccè'è bhântal èbakto tèđung sè ta' nomtom.

Mar-samar èkèđing dhibi' monyèna nyabâna sè ta' tennang, nyabâ sè sanyatana terro èbuwangnga dâri dâđâna ma'lè ta' sella'. Tanang duwâ'na ètoto paghi ka mowa. Tèppa' èmata duwâ'na. Terros èosapaghi ènga' rèng marè ngolok salam èbâkto âbhâjâng. Pas marobbhu tengngana, aghenthang, abhântal lengngenna sè kacèr. Ngoddhi meddhem, tapè ta' abit matana temmo mancella' polè, ta' kala orèng sè takerjhât. Sowara nyabâna sajân santa' sampè' dâđâna noro' aghuli. Èyabâsaghi bhântal sè bâđâ è olona, dâun sèrè pastè ghi' bâđâ è bâbâna.

Bhidhâ bi' bâkto tèđungnga, satèya jhâghâna ca'-malèca', lemmes èngâ' orèng tâ' anđi' ora'. Toju' polè è paddhuna lèncak ènga' sè ghellâ'. Coma satèya bhâdhâna bân mowana nonđu'. Tananga negghu'i cèthak, kanan kacèr sambi aghumbhi' obhu'na. Abit sè nonđu', neng-neng ta' aghuli, ta' asowara, ènga' orèng sè parèppa'na mèkkèr. Nyabâna sajân abit sajân santa', ènga' orèng ngangsor. Sèttong kapotosân la èpastèyâghi. Mantèp atèna, maèlang rassa kobâtèr.

"Èpamarèya apa sè la sèngko' molaè", oca'na mantèp è dâlem atè. Tanangnga merghâm, ghîghina akarettep, ngaret. Pas abâlinđhes, abhâlik bhâdhâna, ngala' bhântal pas èkèpataghi. On-laon èkala' dâun sèrè sè la èlop, sè la lèm-samalèm èkacèccè'è bhântal.

Ebbhun sè toron macellep atè, madhâddhi sala sèttong alasân arapa Firða ma' cè' sennennga ka suasana ghu-lagghu. Dhibi'na lèbur kèya mon sorop arè. Makkèya pareppa'na cè' rëpoddhâ bânnya' lako, tapè ghi' nyempataghi nèggħu compeddħâ mata'arè. Sanyatana pemanđangan sè sakejjhâ', bâkto mata'arè apamidħân molè èkancaè mègħħâ abârна mèra. Bânnè mèra sè mapanas, tapè mèra sè lèbur, macellèp atè. Sèttong kadhâddhiyâñ sè matao rassa èħlassa mata'arè toron dâri tahtana, abârri' kasempadħân kâ' bintang ka'angghuy ngessè è bâkto malem. Abhârri' kasempadħân ka angèn kaangghuy ka bârâ' ka tèmor neng pettengħha, sambi ngambâ' ebbhun toron ka bhumè, sabellum lagħħuna mata'arè nyebâbagħi ebbhun èlang. Ropana mata'arè ta' endâ' bit maabit èyellos angèn. Kalabâna sonarra, mata'arè ngala' paksa ebbhun abâli ka èddhi'na. Sakejjhâ' èlang. Makkèya lagħħu ghi' ta' ongħħu-ongħħu tèra', tapè malem satèya Firða anđi' nèyat laèn samarèna ngabâsagħi compeddħâ arè.

Magħrib la rebħâng. Firða ajħâlân dep-ngendep è lowar pagħâr buđina romana. Èabâsagħi dâun sèrè sè

tombu cè' lebbhâ'na. Èpetthèk salâmbâr, èpèlè sè palèng lèbâr, sè bħiru ngođā, keng sè ora'nâ ta' patè ketara. On-laon dhuli èpamaso' ka dâlem capènga. Pas ajħâlân polè deb-ngenđeb maso' ka dâlem roma.

Ètotox pas èkonci labâng kamarra dâri dâlèm. Firða toju' è korsè, è mèjä ajħâr aqqidħep ka kaca. On-laon èpakalowar dâun sèrè dâri capènga, pas èbârbâr è mèjä ènġa' kertas. Firða ngala' po'lot è saloroghâna mèjä, sambi mèkkèr, mamantep atèna, rèya bânnè pengkhianatan. Rèya għun ghâbây obħât. Dhâddhi ta' kċera dhusa.' Firða sanyatana ta' bisa top-notobhi jhâ' abâ'na ghi' arassa kobâtèr, ghi' apangrasa sala. Saongħuna sakonè'-bânnya' rèya matao ta' èstona abâ'na ka lakèna.

Po'loddhâ ètegħħu' pasekken. Lakar anèyat ngangħħuy po'lot sè ta' patè tajħâma ma'lè dâun sèrèna ta' peđđhâ. Tananga Firða ngetter bâkto konco'na po'lot nyeddħing ka dâunna sèrè. Dâri konco' sè kanan, ètolès ngangħħuy horop arab sè mapolong nyamana dħibbi' kalabâna nyamana orèng lakè' sè cè' èkakerrongna. Bâkto la marè nolès, mowana becca, tananga ojāng, keng atèna legħha polana la marè norodhi apa se dhâddhi pangaterrona atèna.

Tanangħha Firða ojħâng, bēcca. Hawâ è lowar cè' cèllèbbħâ, polana ojhâna sè cè' dherressâ ghellâ' sorè. Pantessâna bhâi malem satèya cè' seppèna. Èabâsagħi Alqur'an sè bâđâ è attas mèjä. Èbukka' neng sèttong halaman khusus. Firða ngangħħuy tonjħu'na sè kacèr kaangħħuy abâtessè halaman ma'lè ta' tacampor bân halaman laèn. Firða maca artè dâri sèttong ayat, bân maca kèya artè dâri ayat sè laènna. Firða saongħuna takèrjhât, bulu kolè'na marombung, kalowar pello kacep, ngartè maksot ayat ghellâ'.

Firða ta' bisa notobhi rassa tako'na. Abâ'na cè' ngartèna ma'na dâri ayat ghellâ'. Ayat sè ètolès èdâun sèrè, ètambâ polè mapolong nyamana bân nyamana rèng lakè' sè èkakerrong. Makkèya Firða matennang abâ'na kalabâna alasân ghâbây obħât, sanyatana abâ'na cè' taona jhâ' bâđâ bhântowanna iblis bân sètan dâlem nambâħi posangħna atèna. Èkala' po'lot sè la bâđâ è adâ'na, pas èsalèn lafat sèttong ayat sè la èsèyapagħi. Teppa' è attasa tolèsâna arab nyamana bân nyamana rèng lakè sè èkakerrong. Ngangħħuy tolèsâna arab, bahasa Arab.

'Mon pasangan halal sè tapèsa jara' sampè' ta' bisa apolong tèđung ollè ngalakonè ritual rèya, arapa sèngko' ma' ta' ollè? Pađahal rèng lakè' sè sèngko' kerrongè arèya sanyatana pantès dhâddhi tang lakè, sè cè' masennengħha ka tang atè?! Kalabâna nèyat sè pastè, Firða melkot dâun sèrè teppa' è bâtès tèngħġana saengħħa nyamana rèng lakè' ghellâ' bâđâ neng bun attas, nyèccè' èlembâr sè bâđâ nyamana Firða. Kalabâna ngètèk, Firða maca

bismillahirrahmanirrahim, pas nyabâ' dâun sèrè è bâbâna bhântal. Tapè apa ollè maca bismilla kaangghuy molaè ritual ènga' rëya? Firða ðhibi' ta' bisa matènnang atèna kalâbân jâwâbhân sè pastè.

Èpapolong dhâlápâ' tananga, pas èkaghâbây bhântal pèpèna sè kanan. Firða tèdung mèrèng ka kanan, ngaðèp ka kiblat. Ngoddhi meddhem ma'lè dhuli maso' ka mèmpèna. Satèya la lèbbi ðâri tènga malem, pastèna rèng lake' sè èkakerrong la tèdung këya. Èlerèk jhâm è mèjâ noddhuwaghi pokol 00. 27 WIB. Firða taèngâ' polè ka bhâktô-bhâktô ðhibi'na ghi' sèr-sèrrân. Biasana mon la pokol 11 malem, sèr-sèrranna la ngoca' katondu. Dhâddhi satèya bisa èpastèyaghi rèng lake' sè èkakerrong pareppa'na tèdung këya, dhâddhi bisa tatèmmo neng mèmpè.

Posangnga atè sè sabelunna ta' mangidhâ, satèya mala cè' ghâmpangnga Firða tèdung, mala cè' ngidhâna. Kotondu sè sangèt bân kërrong sè taðâ' tambhâna ka rèng lake' sè terro ekapolongnga tèdung, la nèmmo obhâddâ, la tatèmmo bân ðokterra.

Ardian maso' ka romana. Pajhâlâna ènga' sè cè' kasona. Dhâmar ampèr aðâ' ghi' katon oði'. Ngangghuy konci sèrep èbukka' labâng aðâ'na, maso' ka roang tamoy. Ardian marobbhu bhâdhâna ka korsè lembu'. Èbukka' sapatuna, tapè kaos sokona pagghun èangguy. Ètera' è dhâmar ðâri ampèr aðâ' sè ta' patè tèrrang. Ardian tatèdung è konsè sè bâdâ neng ruang tamoy.

Ta' abit tatèdung, Ardian ngèding sowara mar-samar ðâri kamarra. Kamar kennenganna Firða, binèna sè pareppa'na tèdung. Ardian jhâghâ, pas toju' è korsè. Sambi pek-kèpeghâñ ghita' saðar. Akeddhâp pan-bârâmpañ kalè, ma'lè dhuli onga'. Ghi' ta' patè saðar, Ardian ngèding sowara mar-samar, sowarana Firða anyabâ tapègghâ, ngap-kalengabhân, sambi ngaret. Ardian cè' plasdhâna ngèdingaghi sowara ghellâ', rëya sowara nyabâna Firða.

Pagghun ngangghuy kaos soko, Ardian masemma' ka labâng kamarra. Ajhâlân laon, sokona tèng-nèttèng. Ètegghu' ghâghângâ labâng, ngoddhi mukka'a. Ta' taona labângâ èkonci ðâri ðâlem. Ardian nonðu', nyornè' ðâri lobângâ konci. Mar-samar polana ðhâmar ta' patè tèra', padðhâng jhâ' binèna sè raððhin pareppa'na tèdung kaðhibi'âñ. Kèng tèdungnga aser-blukser. Sambi nyabèna ngos-ngosen, tananga Firða agâng-raghâng ka attas.

Ardian abhâlik pas abâli ka korsè sè bâdâ neng roang tamoy. Pas ðung-tèdungan polè sambi mèkkèr. Tananga sè kanan ètompangaghi ka ðâina. Ardian nga'-ngèngâ' an ka robâna binèna bâktô anyabâ ngos-ngossân ghellâ'. Robâ sè segghut èabâsaghi Ardian mon binèna pareppak'na apolong tèdung bân abâ'na. Mon tananga Firða sè ali-ghuli, agâng-raghâng ka attas, padâ bâktô Firða biasana ngeppè' lakèna bâktô apolong lakè-binè è

ranjang bâktô malèm Jum'at. Aghellu' lè'èr otabâ aghellu' tèng-ngentènganna lakèna. Bâktô ènga' sakabbiyâna, Ardian molaè posang, tèdunga mèrèng ka kanan bân ka kacèr, alik-bhâlik, abhântal tanangnga. Ngoddhi meddhen tapè ta' dhik ngiddhâ.

Labângâ kamar Firða abukka'. Bâdâ monyèna orèng ajhâlân soko ajhâlân nyemma'è. Sabellumma sowara soko ghellâ' sajân jèllas, ropana sowara ghella' abâli majhâu maso' ka kamar polè. Tapè ta' abit monyèna soko abâli polè nyèmma'è Ardian, cè' semma'na. Sapo' tebbel èsapo'aghi ka Ardian sè tèdung è korsè. Taðâ' sowara, seppè. Kacep.

Èghârâssa sonar maso' lèbât kalambu sè èbukka'. Mata duwâ'na cerkeccerran, solap. Sapo' tebbel sè èsapo'aghi binèna ghellâ' ghi' èangguy. Saongghuna ta' patè cèllep, ghun taðârina lèssonâ. Ajhâlân on laon ka kamarra, ðut-tasaronðut. Nonðu' sambi nègghu'i sapo' è dâdâna ma'lè ta' locot.

'Dâteng pokol saponapa malèmma, ka'?, sowarana Firða lembu'sambi toju' è mèjâ rias. Ardian èghem, lajhu marobbhu ka ranjang. Ðâri ðâlem sapo'sè ètotopaghi mowana, Ardian sempat alèrèk. Firða parèppa'na makerrèng obu'na sè becca, marè atolo ghu-lagghu. Ardian notop sapo'âñ polè, ngiddâ polè.

Firða atolè ka katèdunganna, mèsem cè' bhungana. Èabâssaghi lakèna tèdung abhuko' sapo', ngangghuy bhântalla. Bhântal sè samalèm èangghuy ðhibi'nâ kaangghuy ngobâdhi atèna se posang. Salembâr dâun sèrè sè bâdâ è bâbâna bhântal sè dhâddhi alasân abâ'nâ koðhu manði atolo ghu-laggu. Firða sem-mèsem polè nga'-ènga'an malemma bisa amèmpè apolong tèdung bân lakèna. Rèng lake' sè aghellu' anga' bân lembu'. Firða ngabâs mowana sè cè' tèra'nâ, cè' bhungana. Taðâ' polè atè posang, sè ngakibataghi abâ'na ta' bisa tèdung lem-samalem sabellumma.

Mèmpè jhubâ' ropana ðâteng ðâlem mèmpèna Ardian. Pan-bârâmpañ kalè Ardian ghîghina agâret, tananga merghem, nyabâna ngangsor. Mowana ðâng-nyaroðang, ðâina ojâng. Firða ngosap pellona lakèna, bân nyiom ðâina. Ardian takèrjhât. Ta' èkanèyajâ sakalèngadâ' tanang sè kanan ngerpas mowana Firða cè' kajâna. Firða nangès sasenggu'âñ, jhâghâ ðâri katoju'âna, ngallè ka lowar sambi nègghu' pèpèna.

Firða notop kamar ðâri lowar. Abâ'na nyandâr è labâng. Sambi nangès nègghu'i pèpènâ. Firða tao mon lakèna ta' sèngaja ngerpas mowana cè' kajâna. Lakèna pagghun tèdung ngidhâ. Arapa saongghuna Ardian? Firða pas ènga', salèmbâr ðâun sèrè sè malèmma ghi' pagghun è bâbâna bhântal sè èkatèdungè lakèna.

#Lobâr#Q

Balai Bahasa Provinsi Jawa Timur mabâdâ Kegiadhan neng Polo Madhurâ

Dwi Laily Sukmawati

Neng taon 2014 semangkèn, Balai Bahasa Provinsi Jawa Timur aghanđhu' pan-saponapan program kegiadhân pemasyarakatan bahasa sareng sastra, akadhi Penyuluhan Bahasa Indonesia, Bengkel Bahasa sareng Sastra, Lomba Musikalisasi sareng Macapat, Pemilihan Duta Bahasa Jawa Timur, Seminar Bahasa sareng Sastra, Rakorda Pemuda Se-Jawa

èhossoaghi ðâ' sadhâjâ maghârsarè sè bâdâ neng Jhâbâ Témor, akadhi guru, morèd, mahasiswa, ngangoðâdhân, sastrawan, wartawan, budayawan, praktisi, akademisi, santré, pongghâbâ TU, tor salaènèpon. Tojjhuwân kegiadhân ka'ðissa' kaangghuy marèngè informasi takaè' sareng perkembanganna bahasa sareng sastra Indonesia sè bâdâ neng Jhâbâ Témor.



sala settong narasumber marèng jhâjhârbhâ'ân takaè' sareng "Teks Eksposisi"

Timur, Rakorda MGMP Se-Jawa Timur, Sosialisasi Uji Kemahiran Berbahasa Indonesia (UKBI), Penandatangan Nota Kesepahaman (MOU) sareng Perguruan Tinggi Negeri sareng Swasta neng Jhâbâ Témor, tor ghi' possa' salaènèpon. Kegiadhan ka'ðissa'

pelatihan sè èbimbing sareng ennem narasumber ðâri Balai Bahasa Provinsi Jawa Timur, èyantarana: Drs. Amir Mahmud, M.Pd (Kepala), Dr. Suyatno, M.Pd., Tri Winiasih, M.Hum, Drs. Yani Paryono, M.Pd., Mashuri, S.S., sareng Dwi Laily Sukmawati, S.Pd. èyarep ru-ghuru



Peserta katon ghu-ongghu dâlem ngèrèng pelatihan sè èpabâdâ sareng Balai Bahasa Provinsi Jawa Timur

2. Sosialisasi Uji Kemahiran Berbahasa Indonesia (UKBI)

Sosialisasi Uji Kemahiran Berbahasa Indonesia (UKBI) neng taon 2014 ka'dìnto kalampan sareng Balai Bahasa Provinsi Jawa Timur neng Aula STKIP PGRI Sumenep bulân April tangghâl 29—30. Kegiadhan ka'dissa' ètoro'è sareng 100 ghuru SMP, SMA, SMK, MTS, sareng MAN sa-Kabhupatèn Songennep. Ka'angghuy sadhâjâ peserta, UKBI ghi' èanggħap anè, polana kabânnya'an peserta ghi'ta' pernah kennal sareng Balai Bahasa Provinsi Jawa Timur napahpolè onèng dâ' ka samacemma kegiadhanna Balai, sala sèttongnga UKBI ka'dìnto. Bâkto Drs. Amir Mahmud M.Pd mènangka Kepala Balai marèngè sambutanna, peserta langkong bhunga. Soalla Balai Bahasa ahèrra bisa mabâdâ kegiadhân kabhupatèn sè palèng tèmorra polo Madhurâ, èngghi ka'dìnto neng Songennep. Peserta ngarep ta' namong kegiadhân UKBI bisaos sè èlaksana'aghi neng Songennep, namong jhughân kegiadhân laenna. Acara sè èbukka' langsung sareng

Ketua STKIP PGRI Sumenep, Dr. Muaheri, M.Pd., M.M. ka'dìnto kalampan kalabân hikmat jhughân lancar. Peserta katon ghu-ongghu ngereng UKBI, ngarep malar mogħâ hasella sasoi sareng arebhâna.

3. Penandatanganan Nota Kesepahaman (MOU)

Penandatanganan Nota Kesepahaman otabâ sè lebbi kaalok sareng sebbhudhâ MOU saongghuna bânné hal sè anyar. Possa' perguruan tinggi negeri otabâ swasta sa-Jhâbâ Tèmor ampon mabâdâ *kerja sama* sareng Balai Bahasa Provinsi Jawa Timur. Namong dâlem bâkto 2 taon ka'dìnto, Balai Bahasa abhâdhi cara laèn dâlem pelaksanaan MOU. Bânnè namong perguruan tinggi sè terro mabâdâ'â *kerja sama* sè rabu langsung ka Balai Bahasa. Sabħâligħha, Balai Bahasa jhughân rabu dâ' ka perguruan tinggi saè negeri otabâ swasta sè terro mabâdâ'â *kerja sama* sareng Balai Bahasa. Manabi neng taon sabellunna Balai rabu ka Universitas Bondowoso sareng STKIP PGRI Ngawi, neng taon 2014 ka'dìnto Balai Bahasa rabu dâ' ka STKIP PGRI Sumenep sareng

LALAMPA'AN

UNISMA Malang ka'angguy mabâdâ *kerja sama*. Tojjhuwân èpabâdâna kegiadhân ka'đinto ta' laèn ka'angguy maraket hubunganna Balai sareng pasèra'a bhâi sè èyajhâk *kerja sama*, sopajâ lebbi ghâmpang dâlem mađâpa' sadhâjâ perkembangan bahasa sareng sastra sè bâdâ neng Indonesia dâ' ka magharsarè neng Jhâbâ Tèmor. Sajân possa' perguruan tèngghi negeri otaba swasta sè alako bhareng sareng Balai Bahasa, hal ka'đinto bisa maghâmpang tor maceppet jhâlânnâ informasi kebahasaan sareng kesastraan. Malar moghâ *kerja sama* sè èpabâdâ sareng sadhâjâ unsur lapisan neng Jhâbâ Tèmor ka'đinto bisa marèngè hasèl sè saè.



Nota Kesepahaman antara
Balai Bahasa Provinsi Jawa Timur sareng STKIP PGRI Sumenep



Kepala Balai Bahasa Provinsi Jawa Timur, Drs. Amir Mahmud, M.Pd. asareng
Ketua STKIP PGRI Sumenep, Dr. Musaheri, M.Pd., M.M.



Jâr-kalènjâr dâ' ka Karaton Songennep, tarètan sadhâjâ bhâkal mapak ornamèn khas sè aropa' aghi ghâlimpo'anna aghâma bân bhuuddhâjâ mancanaghârâ. Karaton sè èpaddhek neng partengnga'anna kottha ghâpânèka èpaddhek èbâkto Pamarèntaanna Panembâ'ân Sumolo I taon 1762. Bhângon karaton ka'dinto abujud bhuuddhâjâ Jhâbâ, Islam, Chèna, sareng Èropa.

Jâr-Kalènjâr dâ' ka Karaton Songennep

Harkoni Madura

È qâlem karaton bânnya' dhâdhingghâlân-dhâdhingghâlân sè aghândhu' sajara akadhi Panđhâpa Aghung, Kantor Konèng, sareng bekkas karaton Radhin AjhuTirtonegoro sè samangkèn èpadhâddhi kennengnganna nyèmpen kas-pakakas kona. Karaton Songennep èpaddhek neng partengnga'an sè kapèng duwâ' abad 18 sè èkatowaë sareng rato Songennep, èngghi panèka Panembâ'ân Sumolo otabâ Tomenggung Arya Nata Kusuma.

Karaton ka'dinto èpaddhek sareng orèng cèna sè asmana Liaw Piaw Ngo. Lèbat pamèkkèranna Liaw Piaw Ngo ka'dinto tombu sèttong karaton sè anè sè macampo bujud arsitèktur Èropa, Chèna, sareng Jhâbâ. Pasèra bisaos sè akalènjâr dâ' ka karaton panèka aromasa ngoladhi karaton Jhâbâ kalabân lar-pèlar tor aghâduwi panđhâpa sè lèbâr ka'angghuy narèma tamoy, pangkèng ngâpas rato èbâkto laod, jhughâ kennegngan pamandiyânnâ raghâpadmè sareng trè-potrèna rato. Dhinèng ornamèn abujud Èropa akadhi rangkè'anna ata' sè para' padâ'â sareng klènthèngnga Chèna.

Panđhâpa Aghung kantos samangkèn èyangghuy mènangka kennengngan èbâkto bâdâ acara-acara kabhupatèn akadhi ngambâ' tamoy naghârâ otabâ propensi, "serah terima jabatan", sareng acara kanaghârâ'ân laènna.

Dhinèng kantor konèng sè aghândhu' artè kantorrepon rato, ñhimèn mènangka pangkèng kaangghuy Sultan Abdurrachman

JÂR-KALÈNJÂR BÂN BHUDDHÂJÂ MADHURÂ

Pakunataningrat I ngastanè kalakowan mamolan pamarènta'an salèrana taon 1844 Masèhi. Selaèn tello' pangkèng kasebbhut è attas, neng kompleks karaton jhughâ bâdâ taman sare mènangka pamandiyanna pottrèna rato sè kaoladhân asrè tor perna kantos samangkèn. Bâgiyân laèn dâri karaton Songennep èngghi ka'dinto labâng lowar sè kasebbhut Labâng Mèsem sè artèna Tatakramana maghârsarè Songennep dâ'tamoy sè dâteng ka karaton.

Musium èbâgi dhâddhi tello' bâgiyân, bâdâ è lowar tor è dâlem karaton. Bâgiyân sè nomer sèttong bâdâ è lowar karaton mènangka kennengngan ka'angghuy nyèmpen karèta kencana karajhâ'ân Songennep tor rato sè ngangghuy jhârân sè èparèngè rato Inggris, kantos samangkèn èromadhi tor èpakalowar bâkto pacara parèngeddhan maddhegghâ kottha Songennep.

Bâgiyân sè kapèng duwâ' bân tello' bâdâ è dâlem karaton Songennep. Sè bâdâ neng dâlem kennengnganna

**Pasèra bisaos sè akalènjâr dâ' ka
karaton panèka aromasa
ngoladhi karaton Jhâbâ kalabân
lar-pèlar tor aghâdhui
pandhâpa sè lèbâr ka'angghuy
narèma tamoy, pangkèng ngâpas
rato èbâkto laod, jhughâ
kennegngan pamandiyânnâ
raghâpadmè sareng trè-potrèna
rato.**



nyèmpèn pakakas ka'angghuy pacara pèlèt kanđung mènangka kalowarga rato. Sanjhâta-sanjhâta kona akadhi kerrès, pèstol, peddhâng, jhughâ samurai ghenna' sareng rasoghân bessè sè èyagghuy perrang. Alqu'an sè èserrat dâlem bâkto sa'arè samalem sareng Sultan Abdurrahman.

È penghirâ karaton bâdâ sèttong kolla sè anyama Taman Sarè. Metorot pamangghina maghârsarè neng sokobengnga, manabi araop kalabân aèng kolla panèka bhâkal maserra' cajâ kantos katon ngođâ. Kolla panèka aëssè aèng tabâr, jhughâ jhuko' sè acok-racok. È antara karaton sareng kolla Taman Sarè tombu bhungkana bâringèn rajâ sâbhungka tor aomor ratosân taon. Bâringèn panèka mènangka sèttong saksè sajara ghumbhussâ karajhâ'ân Songennep dâri taon ka taon.



<http://www.kaskus.co.id/>

TATAKARAMANA NAMOY/KATAMOYAN

H. Abdir Arifin

Para maos!

Sadhâjâ orèng bâdâ è ka'đimmaa bisaos kodhu aghuna'aggi tatakrama sè akor sareng kaparlowannépon, è jhâlân, è kompolan, jhâng-onjhângan, sareng salaènnépon. Saka'đinto jhughân èbâkto namoy tanto bâdâ tatakramaépon. Rasoghân sè èaghem èbâkto namoy sè pantes (sopan), langkong saè pole asongko', manabi binè' ađung-kođung. Tantowépon bânnè namong tamoyya, orèngnga sè katamoyan saka'đinto jhughân. Ta' cokop namong asalebbârân pandâ', akaosan kaangghuy mangghi'i tamoy. Ta' mèlè tamoy pasèraa bisaos, sadhâjâna kodhu èajhinè (éhormat).

Saamponna napa' ka compo'na orèng sè bhâđhi ètamoyana langkong ñhimèn ngatorè salam, manabi bâdâ ebbèl langkong ñhimèn mèc'e' ebbèl ñhimèn, jhâ' lajhu alongghu manabi orèngnga ghi' ta' kalowar ngatorè longghu. Manabi orèngnga sè ètamoyana ampon kalowar tor ngatorè longghu, bhuru tamoyya alaongghu. Jhâ' loppa mokka' katètèyan (sandâl) èsabâ' è bhâbhâtor. Sè saka'đinto bânnè namong kaangghuy compo' sè akramik bisaos, sanaossa compo' sè ta' èpalèstèr ta' kèngèng èbhidhââghi. Alongghu sè saè ngađhep ka orèng sè ètamoyana, manabi bisa jhâ' kantos ajhâjhâr sareng orèngnga.

Para maos!

Ka'-angka'an sè aropa kobhi otabâépon ettè, manabi èbâđđhâi cangkèr sè bâdâ ghu'-tegghu'na, jhâ loppa ghu'-tegghu'ha cangkèrra èsabâ' è pèngghir kanganna tamoyya. Manabi èatorè ñhâ'ârân sè ngangghuy sođu sareng garpu, langkong saè sođu sareng garpuwépon èsabâ' è pèngghir kanganna perèng sè èpakorong. Dhinèng sođuna èsabâ' pèngghir kanganna garpu. Manabi ađhâ'âr tor-ator (ka'-angka'an), sođu sareng garpuwépon jhân kantos pamonyè, dhâddhi kodhu tè-ngatè nyoprè ta' èsangka sè nè-bânnè. Saka'đinto jhughân manabi ampon lastarè ađhâ'âr, sođu sareng garpu jhâ' paghentang, kodhu èpakorong. Manabi èpaghentang ghâđhuwân artè korang dâ' ka'-angka'annépon.

Kaangghuy orèng sè katamoyan, èbâkto ngatorè ka'-angka'an parjughâna aghuna'aggi panyedđhâ'èpon bhâsa akadhi: "Ngèrèng èatorè ka'đinto bângalan" maksoddhâ manabi ka'-angka'annèpon namong biddhâng bisaos ta' mabi jhâjhâna otabâ tambol. Bisa jhughân akadhi ka'đinto: "Ngèrèng èatorè ka'đinto namong nyè'-konyè' għunong, samo-temmona" saka'đinto manabi ka'-angka'annèpon aropa ñhâ'ârân sareng samacemma. Saka'đinto bisaos satembil tatakramaépon namoy/katamoyan parjughâna èangghuy sareng èbulângngaghi dâ' potra potrè nyoprè ta' èlang adhâd Madhurâwépon.

KALDU KOKOT



WAHYUNI- ZAEN

Asiiuuuuuttt! ghumeccer rassana manabi mèréng Oca' Kaldu Kokot. Kaldu Kokot aropa'aghi sala sèttong ñhâ'ârân (kuliner) sè bâdâ neng Kottha Songennep, sanaos neng Kottha Mekkasân bâdâ jhughân, namong lebbi bânnya' tor kapra neng Kottha Songennep. Kaldu Kokot mènangka ñhâ'ârân kona (Tradisional) sè èkasennengngè sareng sadhâjâ maghârsaré Songennep salaèn soto sareng rojhâk. Oca' Kaldu neng bhâsa Madhurâ mènangka Kèrata Bhâsa, èngghi ka'dinto sèttong oca' sè èartè'è mènorot cap-keccabbhâ. Jhârna'èpon Kaldu = èkalkal pas èsodu.

Manabi oca' kokot tanto bisaos ampon samè-samè ngaghâli jhâ' sokona sapè. Nangèng manabi Kaldu, abâk nyangkabel sabâb, oca' Kaldu bhâsa jhâbâ sareng oca' Kaldu bhâsa Madhurâ ka'dinto laèn. Kaldu neng jhâbâ aropa kowana dhâghing sè èkella, namong manabi kaldu madhurâ aropa arta' sè èkella dhi-kadhiyâ tajhin kèng ngangghuy palappa. Dhâddhi sè èmaksot kalabân Kaldu Kokot èngghi ka'dinto kaldu arta' ècampor kokot.



Dhinèng palappaèpon sè èkocek èngghi ka'dinto:

1. Bhâbâng potè
2. Jhâi
3. Sa'ang potè
4. Pa'ala,

Bârâghâttèpon kaldu kokot èngghi ka'dinto:

1. Arta'
2. Kokot (sè bhersè = èbuwâng kolè'na)
3. Bhâbâng potè ghuring
4. Bhâbâng mèra ghuring
5. Bhâbâng ñâun ghuring
6. Topa' (manabi ngangghuyâ)
7. Korket sabbhrâng (manabi ngangghuyâ)
8. Jherruk peccel (manabi ngangghuyâ)

Arta' sareng kokot èkalkal (èkella) sampè arta'na bellâ. Saamponna arta'na bellâ, sadhâjâ palappa kocek èghângsa/èghuring, pas ècabbhur ka kalduwèpon. Saamponna palappaèpon ècabbhur terros èkalkal sampè' sadhâjâ arta'èpon ancor, sambi èpasangè bhâbâng potè ghuring, bhâbâng mèra ghuring, bhâbâng ñâun ghuring. Saamponna sadhâjâna palappa sareng bârâghâttèpon lastarè èpasang, kaldu kokot ampon bisa èdhâ'âr. Manabi ghi' korang jhârna' èatorana longghu ka Songennep.

NASÈ' SÈRPANG,

DHÂ'ÂRÂN KHAS BHÂNGKALAN

Sri Wulandari

Ta' ghenna' rassana manabi èntar ka polo Madhurâ, hosossa dâ kabupaten Bhângkalan ta' arassaè sè nyamana Nasè' Sèrpang. Kabupaten Bhângkalan ta' coma kalonta kalabân pasarèyanèpon Saichona Moh. Kholil, namong jughân kalonta kalabân dhâ'ârân sè rassana langkong saè. Nasè' sèrpang panèka mènangka dhâ'ârân khas Bhângkalan sè èjhuwâl ghu-lagghu. Dhâddhi jhâ' kasambu' manabi ampon naré' sakonè' ampon taqâ' orèng sè ajhuwâl nasè' ka'ñinto. Sè terro ollèya nasè' serpang ka'ñinto jhughân kodhu ghilirân, sabâb sèttong orèng sè ngobângè pastè abhungkos lebbi dâri sèttong.

Mètorot carèta, dhimèn nasè' sèrpang ghâpanèka èjhuwâl sareng rèng ta' andi' neng sala sèttong kenenggan, sè bâdâ neng dhisa Sabiyan Bhângkalan, Madhurâ. Rèng ta' andi' ka'ñissa' jumlana kèngèng 7 orèng, rama, èbhû, sareng 5 potrana. Manabi aqdhâ'âr, èbhuna segghut amassa' ès-paès (cakalan, oqâng, sareng jhângkang), su'un masssa' kècap, kella patè, sambhel ghuring (kella pathè sè èssèna tahu sareng kolè'na sapè), cèngè acan, rampèyè' oqâng sareng kacang, dhingdhingnga sapè, sareng nasè'.

Sadhâjâ dhâ'ârân ka'ñissa' nyatana ta' cokop ka'angghuy sakalowarga. Ahèrra èbhuna mantha nasè' sareng jhuko'na nè'-sakonè' èbâng sopajâ paqâ mèlo. Dâri èpanthana nasè' sareng jhuko' sè nè'-sakonè' èbâng ka'ñissa', ahèrra èbhû



Nasè' sèrpang, dhâ'ârân khas Bhângkalan

ghellâ" lajhu ajhuwâl "nasè' sèrpang". Sèrpang, mènangka sala sèttong nyama dhisa neng Kacamadhân Arosbhâjâ, Bhângkalan, Madhurâ. Ènyamaè nasè' sèrpang, polana jhuko'en possa' dâri dhisa Sèrpang. Jhuwâlanna ahèrra dhâddhi kalakowan sè ron-binoron.

Nasè' sèrpang èbhungkos ngangghuy dhâlubâng nasè' sè è dâlemma èlama'è dâunna gheqdâhâng. Carana ajhuwâlân jhughânan langkong ghâmpang, namong èghir-pèngghir jhâlân ngangghuy bhuuddhâk. Kennengnganna nasè' sareng jhuko'na biyasana èpjungè, è pèngghirâ bâdâ korsè plastèk kènè'. Hal ghâpanèka sè dhâddhi cèrè khassâ nasè' sèrpang sè pagghun èjâgâ kantos samangkèn. Biyasana, orèng ajhuwâl nasè' sèrpang bâdâ è partellon hotèl PKPN otabâ è pèngghir jhâlân è aqâ'na toko busana Indah. Èssèna nasè' serpang èyantarana:

- Nasè'
- Ès-paëssâ cakalan
- Kerrang sè èmassa' sambhel ghuring
- So'un sa' kècap
- Tellor accèn masèr
- Cèngè acan
- Dhingdhingnga sapè
- Krèpè' bhâra
- Ghângan
- Krèpè' kancur kènduy ècampor kacang

Manabi tarètan sadhâjâ terro nyacagghâ saèna nasè' sèrpang, èyatorè para tarètan rabu ka Bhângkalan, Madhurâ. Manabi terro ngobângenna nasè' panèka, kodhu dâteng palagghuwi, asabâb manabi ampon naré' sakonè', nasè' sèrpang biyasana ampon ghârus. Kalabân arghâ sè moqâ, tarètan sadhâjâ ampon kèngèng arassaè nasè' sèrpang sè mantep.



Nasè' sèrpang sè èssèna: nasè' potè, dhingdhing, sambhel, tahu, cèngè acan, krèpè' kènduy, su'un kècap, ès-paëssâ cakalan, tellor siyap èdhâ'âr

Orèng Pojhur

Siti AM.

Orèng pojhir noro' ghilina aèng sè ka onjhur
Orèng jhujhir matè ngonjhur.

Ođi' rèya kodhu bhibhika
Ajhâlâna ma' ta' sala tèngka.

Teppa' ca'na rèng towa
Jaga bhâjângnga, pakoko imanna.

Parokon sè atarètan bân atatangghâ
Mon terro ođi' legghâ.

Jhâ' nga'-bângal ka rèng towana
Bi-lebbi ka rèng towa binè'na

Rèng towa binè' mandhi pangoca'na
Mon tasala dhâddhi tolana.

Bilâ ana' bângal; ka sè kađuwâ
Saomorra ta' kèra nemmo sabbâ.

Maskè soghi ta' kenning anggâ'
Sabâb dhunnya rèya bhâkal tadâ'.

Maskè sogâ' ta' kenning madhigâ'
Sabâb bhâdhân rèya đâri bhârâng jhubâ'.

Manossa rèya coma ñarma
Tađâ' sè andî' kobâsa.

Paënga' ka jhâman ahèr
Tapè ajjhâ' sampè' ajhâlân kobâtèr.

Song, 2013

NGAJHI RASSA

NURUL KHOOLIFAH

Malem pornama sè kacep
Nang-konang akeddhep è un-đâunan
Bulân pornama ta' ngombâr-ngombâr
Ta' tao abâ' napa sabâbbhâ

Bulân pornama kèncop kaalèngan
Ondem celleng sè alèngker
Angèn ceddhu aghântè ebbhun

Kèbân-kèbân akalolong
Atè-ghântè sè ngajhi
Đâri sè kèn' sampè' sè rajâ
Makellar-kellarra sè terrowa asambhung trèsna

Malem sajân malem
Samoghâ'â dhuliyâ ngoncèlat
Ondem celleng sè alèngkerrè
Sopajâ dhuli tèra'

(MTs N TERATE PANDIAN SUMENEPE)

AMAÈN BÂNG-BÂNG

Suhartatik (Tika)

(Hom pimpa alaèlung
ghambrèng....)

Duh...abâ' apangrasa dhusa, loppa
terrosanna
Coma ènga' bâdâ ghâris
Ajhâjhâr lajhu ngalèlès abhânjhâr
Ka ðâjâ ka lao'
Ka bârâ' ka témor
Marempa' dhâddhi empa'

(Oddhi nyarè bâlikèr sè bunter
ghâbây panambuna, marè
alèkser..!)

Adhiddhi' bulâ aghuli
Bâng kambângan sambi nembhâng
Lir saalir...maèlang kobâtèr sè
aghilir

Apa bâdâ carêta bâng-bâng
Soddhi ngèrèng nambhâi ghellâ'
Sampè' rop-rosorop arè
Èghumbhirâna dhika??

TÈRA' BULÂN

Oktaviani Z.F.

Bulân pornama è pèngghir sèrèng
Tèra'morka' abbhrâ raddhin
Robâ parabân sarong nyèccèng
Atèngka' laon è pasèr pasèsèr

Angèn ngalessor ombâ' atandhâng
Onjân parao langngo ghulina
Maèlang nèspa ngonðhâng rassa
Mengnga' ta' jhâma' dâ' Sè Kobâsa

(OKTAVIANI Z.F* MTsN TERATE
PANDIAN SUMENEP)



Boros

Orang yang tidak menghemat apa saja, termasuk waktu, uang, makanan, atau kertas disebut sebagai orang yang boros. Sikap boros ini jika terjadi di lingkungan rumah tangga, yang dilakukan oleh istri, suami, atau anak, akan mendatangkan percekcokan karena akan terjadi ketidakseimbangan untuk memanfaatkan materi dalam rumah tangga. Apalagi hal itu dilakukan oleh seorang istri, pemakaian uang belanja tidak mempertimbangkan penghasilan dan pengeluaran, bahkan lebih banyak pengeluarannya, pasti akan terjadi percekcokan dalam rumah tangga karena lama kelamaan akan terjadi kekurangan materi.

Untuk menghindari hal seperti di atas, ungkapan *maske bannya' asella, tape tarapas* 'walaupun besar penghasilan, akan tetapi cepat habis atau boros (dalam Oemar Sastrodiwirjo, 2005: 74) telah mengingatkan kepada kita bahwa leluhur Madura memiliki sikap yang

tidak suka dengan sikap boros. Ungkapan umum Hemat Pangkal Kaya merupakan pengingat bagi kita sebagai manusia agar jangan hidup berlebih-lebihan, makan sekenyang-kenyangnya, belanja sebanyak-banyaknya karena dilandasi ketamakan. Ketamakan ini akan mendatangkan ketidaktenangan hidup manusia.

Berlaku boros dalam kehidupan sehari-hari tidak akan membaw berkah, bahkan malah akan mendatangkan kekuatan bagi kita. Perasaan dan hati akan dikuasai oleh rasa kekurangan, padahal dalam kehidupan kita seharusnya terus ada rasa kecukupan dalam setiap harinya. Orang memiliki rasa kecukupan setiap harinya merupakan berkah Allah. Rasa kecukupan itu hanya akan dimiliki oleh umat yang mau bersyukur. Orang boros akan dijauhi oleh rasa syukur. Untuk itu, perlu kita mengenali nilai-nilai luhur bangsa untuk diterapkan pada kehidupan agar kita terhindar dari sikap boros dan tamak. Amir Mahmud.



Tarapas

Amir Mahmud

Orèng sè ta' bisa anyè'-ènyè' napa' bhâi, tamaso' bâkto, obâng, ðhâ'ârân, otabâ dhâlubâng èkoca' orèng sè tarapas. Kalakowan tarapas ka'ðinto bisa bâdâ neng ka'ðimma'a bhâi, akadhiyâ bâdâ neng ðâlem apo'-compo'. Tarapas bisa èlakonè pasèra'a bhâi, saè raji, raka, otabâ pottra, sè ðibudina këngèng matokaran polana taðâ' kaakoran antara kabhutowan sareng kamampowan. Napapolè manabi kalakowan tarapas ka'ðissa' èka'anđi' sareng bâbinè' sè ampon akalowarga, sè ta' këngèng anyè'-ènyè' obâng bâlânjhâ. Manabi ampon lebbi possa' pangalowaran ètembhâng pamasoghân, pastèna dhâddhi rammèna otabâ dhâddhi tokarra antara raka sareng raji, polana pokedha ðâri kalakowan tarapas ka'ðissa' manossa bhâkal ta' ghâdhuwân pa-napa.

Sopajâ ta' kantos kalampan akadhi hal neng attas, cabocabhân "Maskè bânnya' asëlla, tapè tarapas 'walaupun besar penghasilan, akan tetapi cepat habis atau boros (dalam Oemar Sastrodiwirjo, 2005: 74) ampon maémot dâ' sadhâjâ bârgâh manabi orèng seppo jhâman dhimèn ta' ghâdhuwân kalakowan tarapas. Ongkabhân omom "Hemat Pangkal Kaya" mènangka tanđhâ pangrengat dâ' tarètan sadhâjâ mènangka manossa sopajâ odi'na ta' osa bi-talebbi, aðhâ'âr ta' osa nyang-kennyang ongghu, abâlânjhâ ta' osa ma'-tama'. Manabi manossa ampon tama' odi'èpon bhâkal ta' tentrem.

Kalakowan tarapas ðâlem kaođi'ân rè-saarè ta' bhâkal masenneng, mala sabhâligghâ manossa ta' onèng asokkor dâ' sadhâjâ paparèng ðâri Sè Kobâsa. Maskèya odi'èpon ampon cokop, namong manossa arassa korang malolo. Manossa sè pènter asokkor dâ' paparèngnga Sè Kobâsa, odi'èpon bhâkal samporna amarghâ arassa cokop. Orèng sè tarapas ka'ðissa' èpajhâu ðâri rassa sokkor. Pramèla ðâri ka'ðissa, sadhâjâ manossa parlo onèng dâ' "nilai-nilai luhur" bhângsa ka'angghuy èghuna'aghi ðâlem kaođi'ân rè-saarè sopajâ ta' ghâmpang anđi' bâbâték tarapas tor tama'. (Èmadhurâ'aghi sareng Dwi laily Sukmawati, S.Pd., pantarjâmâ Balai Bahasa Provinsi Jawa Timur)



A.Sulaiman Sadik: Ngangghit ta' Kenal Bâkto

Dwi Laily Sukmawati :

Sanaos ampon seppo, ngangghit serradhân ghi' talèbât èkatrèsnaè, sapanèka *ongkahâ* sè palèng *pas ka'angghuy aghâmbhâraghi* dâ' pasèra'a bisaos sè padâ terro ngaghâliyâ salèrana A. Sulaiman Sadik. Sanaos samangkèn ampon maso' dâ' 79 taon (lahèr è tangghâl 27 Februari 1935 èyangkat dhâddhi ghuru SD taon 1954, *pension* taon 1995 *poljuswâ* 60 taon), samangatèpon ka'angghuy nyerrat pagghun ta' ongrot.

Salèrana mènangka sala sèttong *sastrawan, seniman* (neng taon 1983 maddhek *teater*, pamaènèpon kanca ghuru è kacamadhâm Proppo, salèrana mènangka *penulis naskah* sareng *sutradara*), jhughân *budayawan* Madhurâ sè addhreng ajâgâ tor aromat bhâsa Madhurâ lèbât tolèsan. Salaèn ghâpanèka, salèrana mènangka dosen neng *Universitas Madura* jhughân nyèyar neng Ralita F M k a ' a n g g h u y m a r è n g è jhâjhârbhâ'ân takaë' sareng bhâsa, *sastra*, bhuddhâjâ, tor *sajara* Madhurâ. Ra-kèra pokol pètto' malem, kaulâ ngoddhi acabis ñâ' dhâlemèpon Bapa' Sulaiman Sadik ka'angghuy d h â ' - k a n d h â ' â n b h â b *perkembanganna* bhâsa, *sastra*, bhuddhâjâ, tor *sajara* Madhurâ. Sanarè sakejjhâ', kaulâ ghi' sempat èparèngè onèng pan-saponapan angghidhân sè ampon èserrat sareng Bapa' Sulaiman Sadik. Ta' sakonè' angghidhân sè ampon èyangghit, èyangtarana akadhi: *Pak Toha, Orang Tua Asuh dari Desa Klampar* taon 1986, Balai Pustaka, *Mutiara Bukit emas* (novel) sareng *Sinar Kemilau di Atas Bukit Batu Ampar*, taon 1986, *Bina Ilmu, Madura dalam Sebuah Potret*, taon 1986, *Penerbit Bina Pustaka Jaya*, *Garam dari Madura*, taon 1987, *Penerbit Mandira Jaya Abadi*, *Armada Tradisional Kita*, taon 1990, *Penerbit Mandira Jaya Abadi*, *Kerapan Sapi dari Madura*, taon 1990, *Penerbit Mandira Jaya Abadi*,



A.Sulaiman Sadik

Buku Bâca'an Bhâsa Madhurâ: *Sangkolan sareng Pamekasan dalam Sejarah* (tim) taon 2005, *Penerbit Dinas Pendidikan P dan K Kabupaten Pamekasan, Kearifan Lokal Madura*, taon 2009, *Penerbit Dinas Pendidikan P dan K Propinsi Jawa Timur, Berita tentang maut*, 2008, *Pamekasan dalam Legenda dan Sejarah*, taon 2013, sareng *Selintas tentang Orang Besar Keturunan Bondan Kejawen (Lembu Petteng)*, jhughân *Selintas tentang Bahasa dan Sastra Madura*, taon 2013, *Penerbit CV Karunia Mengenal Madura dalam Catatan dan Gambar*, taon 2004, sareng *Maduraku Oh Maduraku*, taon 2005, jhughân, *Busana Khas Pamekasan*, taon 2003, Bina Pustaka JayaSalaèn ghâpanèka, samangkèn sè parappa'na proses terbit abhul-ombul:

Memahami Jatidiri, Budaya Dan Kearifan Lokal Madura, jhughân *Kamus Sinonim, Indonesia-Madhurâ*, Insyaallah terbi' neng Bina Ilmu. Salèrana angghuta ñâri Yayasan Pakem Maddhu, Pamekasan jhughân aktif neng pan-saponapan kagiyadhân laènna, akadhi onèng dhâddhi *Tim Penyusun Sejarah Jawa Timur*, *Tim Penyusun Sejarah Madura*, *Tim Perumus Eksternal Penyusunan Kurikulum Mulok Bahasa Daerah Jawa Timur*, *Penyusun Kurikulum, Silabus, dan RPP Bahasa Daerah tahun 2013, untuk Sekolah dan Madrasah (SD, MI), (SMP,*



Sosialisasi Silabus / RPP MUATAN LOKAL bhâsa Daerah tk SMA/K, MA
è Batu tangghâl 11—12 Juni 2014

MTS), (SMA, SMK/MA), jhughân mènangka Ketua Komite/Konten Daera/Language Asosiasi Group (LAG)

Perpustakaan Kabupaten Pamekasan, periode 2014—2015. Bâkto hoso' noddhuwaghi pan-saponapan angghidhânèpon, salèrana katèngal talèbât bhunga polana kantos samangkèn, salèrana ghi' èparèngè kasèhadhân ka'angghuy ngangghit serradhân. Bâkto ennom, salèrana jhughân ngérèng pan-saponapan *lomba karya tulis*. Sanarè ta' sadhâjâ *lomba* salèrana èmot, namong pan-saponapan *lomba* sè onèng salèrana toro'è akadhi *Penulisan “Buku Bacaan Fiksi SD Tingkat*

Jawa Timur tahun 2003”. Salèrana mennang *juwara duwâ'*. *Lomba* sè kaðuwa' *Penulisan Cerpen Indonesia Tingkat Jawa Timur*, (1986) juara ðuwâ'. Neng empa' *lomba* laènna, salèrana namong maso' nominasi ðâlem *lomba penulisan Bahasa Tingkat Nasional dengan Judul” Pak Toha Orang Tua Asuh dari Desa Klampar* taon 1986, *lomba Guru SD* sa-Kabhuspatèn Pamekasan, taon 1977 *nomer* sèttong, *lomba Guru Tingkat Jawa Timur* taon 1982, nomer ðuwâ' sareng *nominase* neng *lomba Guru Tingkat Nasional* taon 1984, akadhi sè ampon kacator è yattas.



<http://www.touristlink.com/>



**BALAI BAHASA
PROVINSI JAWA TIMUR**